

說

郭

續

說郛續目錄

另第二十

寶積記

滑惟善

脚氣集

車清臣

望崖錄

王世懋

燕閒錄

陸深

閒中今古錄

黃溥言

綠雪亭雜言

戴英

春風堂隨筆

陸深

雲蕉館紀談

孔運

蒹葭堂雜抄

陸揖

鳳凰臺記事

馬生龍

願豐堂漫書

陸深

天爵堂筆餘

薛嵩

乾貞堂壁疏

虞登名

譚格

張鳳翼

戲瑕

錢希言

塵餘

謝肇淛

談刺 胡江

寶積記

明餘姚滑惟善

春皇者卽庖犧氏別號也所都之國有華胥之淵神  
女游於其上有虹繞之久而方滅卽有孕歷十二年  
生庖犧長頭修目龜齒龍唇有白髯委地人或曰歲  
星十二年一周審地勢以定山川始嫁娶以修人道  
以犧牲薦民服其聖故曰庖犧亦名伏犧時有璘班  
之玉號曰夜明投水則浮又有丹雀啣九穗禾墜地  
帝植於田食者後天而老

軒轅出自有熊之國母曰吳樞以戊巳日生故以土  
德王考歷紀造書契服冕垂衣有袞龍頌吹玉律正  
璇衡薰風至真人集乃於昆臺之上留其冠劍昆臺  
者鼎湖之峻處也立館於下帝乘雲龍逝鄉絕域列  
珪玉於蘭蒲席上然沉榆香春雜寶爲屑以沉榆膠  
和之如泥以分別尊卑華戍之位

常使風后伯常荷書劍旦恒沙而夕陰浦行萬里而  
一息水恒流如沙塵其深難測有大風吹沙如霧中  
有神龍魚鼈能飛有石青石堅而甚輕從風靡靡亦

於波上有草一莖千葉千年一花又名沙海窰封昔  
食飛魚而久百年更生窰封仙人是也

少昊以金王母曰星娥處於璇宮而夜織或乘桴而  
晝游至窮桑滄洪之浦有神童容貌絕俗稱爲白帝  
之子卽太白精也降水際與星娥譌戲奏便媚之樂  
而忘歸窮桑者西海濱也有孤賁之樹千尋葉紅樞  
紫萬歲一實食之不死

帝子星娥泛於海上以桂枝爲表結薰茅爲旆刻玉  
爲鳩於表端言鳩知四時之候今之相風之遺像也

帝與星娥並坐撫桐皋梓琴星娥倚琴而歌曰天清  
野曠浩茫茫萬象泗汨久無方乘桴輕漾著白傍當  
其何至窮扶桑衛詩云期我乎桑中謂此也白帝亦  
歌云四維八埏渺難極驅光遂影窮水城

星娥生少昊曰窮桑氏又曰桑丘氏六國時桑丘子  
著陰陽書卽餘書也少昊以主方一號金天氏又曰  
金寶氏又有五鳳隨方色集於帝庭因云鳳鳥氏金  
鳴山銀滿地如龍蛇之類似人鬼之形有山如屈龍  
之勢故有龍山鳳水之目因以爲姓末代呼爲龍丘



氏

顓頊高陽氏黃帝昌意之子昌意出河濱遇異龍負  
叶玉圖時有老叟謂昌意曰女叶水德而王十年顓  
頊生子有文龍負玉圖之像羣王執玉以禮而辟各  
有班序文德者錫以鐘磬武德者錫以干戈有浮金  
之鐘沉明之磬以羽毛拂之則音振百里浮於水如  
萍藻之流有畫影劒勝空劒若四方有兵其劒飛起  
指其方而克伐未用時於匣中如龍虎之吟

海濱北有勒題國人皆衣羽毛無翼而飛行日無影

乃千歲食黑河藻飲陰山桂張風而翔至中國

晉河之北紫桂成林其棗羣仙餌之

帝之妃鄒屠氏之女當軒轅去蚩尤之凶遷其善者  
於鄒屠之地惡者於有北之地鄒屠氏常不踐地常  
履而飛電游伊洛帝乃期焉納爲妃夢吞日則生子  
凡八夢八生子記云八神亦云八星又云八英又云  
八力言神力英明也

時有丹丘日進瑪瑙甕以盛甘露克於厨也又其國  
有夜叉駒踐之鬼以赤瑪瑙作瓶缶及樂器皆輕妙

魑魅不能逢旃又云瑪瑙是血凝成黃帝除蚩尤并  
四方妖媚填川滿谷積血如淵年久血凝如石丹丘  
之野多鬼血化丹則瑪瑙也不彫削可以鑄器至堯  
時甕猶存露在其中及舜遷甕於衡山上故衡山有  
寶露之壇下有日館以望日月後始皇時零陵人掘  
得赤禾玉甕可容八斗以應八方在舜廟之前後人  
不知年月東方朔識之乃作寶甕頌曰寶雲生於露  
壇祥風起於月館望之山如盈尺視八鴻如察帶八  
鴻八方也

幽州墟羽山之北有善鳴禽人而鳥喙八翼一足毛  
色如雉行不踐地名曰青鵠其聲如鐘磬鳴則太平  
音中律呂及禹平水土棲於川岳之上又有巨查浮  
海其上有光夜明晝滅若星月矣十二年周天而更  
始名曰貫月查又桂林羽衣栖息其上

堯在位七年有抵支國進重明鳥又云重精雙精在  
目狀如雞鳴似鳳時解落毛羽無翅亦飛能逐猛獸  
使妖惡不能爲害飲以瓊膏或一歲數來或數歲不  
至時人每掃洒門戶以待其至或未至則人或刻

爲之狀於門牕，魅皆退伏。今人元日刻畫雞於門戶，此類也。

舜在位十年，有五老游於國都，舜其師道尊之言及造化之始，及禪於禹。五老不知所從，舜葬於蒼梧，有鳥自丹州而來，吐氣名曰馮霄，能嚙土成墳丘，兼能返形變色，登木則成禽，行地則爲獸，嚙青沙如珠，積成塾，阜風吹如塵，後蒼梧之野人採藥得青石，圓潔如珠，服之不灰，帶則身輕。

冀州西北三萬里有孝讓之國，鳥獸昆蟲以應陰陽。

至億年山一淪海一竭魚蛟陸居有赤鳥如鵬以翼覆蛟魚蛟魚以尾扣天求雨

南尋國有陰源其下通地脉中有異魚毛龍同穴時時蛻骨於澤中

周穆王卽位三十二年經行天下馭黃金碧玉之車傍氣乘風越朝陽之岳自明及晦窮寓縣之表有書記其數以瑤華之輪十乘隨王以載其書三十六年王東巡大嶽之谷超重霄之宮集諸方士問術世之世時西王母乘翠鳳輦而至前道以文虎文豹後列

雕驥紫磨碧蒲之蓆黃莧之蓆與王高會薦琬琰清  
觴又進洞淵紅葩嶰山甜雪昆流素蓮一房百子凌  
冬而茂

扶桑東五萬里磅礴山上有桃樹百圍其花青黑萬  
歲一實

滌陽山有神蓬如蒿長十丈周初時國人獻之卽謂  
蒿官白有白橘花色翠而實白大如瓜香聞數十餘  
里

瀛洲上有青石可作磬長一丈而輕若鴻毛

魯襄公十四年晉文公焚山求介子推有曰烏遶煙  
而噪或集介子推之側火不能燒晉人嘉之起一臺  
曰恩煙臺種仁壽木似柏而枝葉長花可食其鳥又  
云仁鳥慈鳥

周靈王二十一年孔子生於魯襄公之世也生之夜  
有二蒼龍亘天下來附微在之房因夢生夫子有二  
神女擎香露於空中而來沐浴微在太常下奏鈞天  
樂列於顏氏之房空中有聲云天感生聖子故降和  
樂有五老列於庭乃五星也夫子生時有麟吐玉書



於里人家云水精之子系周襄而素王徵在賢明  
知其異以綉紱繫麟角信宿而去相者云夫子系殷  
湯水德也

魯定公二十年魯人鑿商田於大澤得麟以示夫子  
繫角由存夫子知命之終乃抱麟而哭紱涕泗滂沱  
及手解紱垂二百歲

三十二年起昆照臺聚天下異木神工得陰生之樹  
千尋其文盤錯以此樹而臺周足大體作拱小枝作  
櫺其龍蛇百獸之形節木精爲泥臺高百尺升之以

望電色時長弘能招致神異王登臺見雲氣蔚然忽  
有人乘空而至鬚髮皆黃非僮之類駕青螭其衣皆  
緝羽毛時天大旱地裂木然其人能唱引霜雪氣一  
噴而雲起雪飛坐者皆噤宮中池井堅冰可琢又有  
人能使卽席爲炎以指彈席而風入室裘褥金爐弃  
諸堦下時有容成子質曰大王以天下爲家而淫策  
異術使變夏改寒以誣百姓文武周公之不取王乃  
疎長弘而受其諫

有韓房者自渠耳國來進玉駱駝高五尺琥珀鳳凰

高六尺火齊爲鏡廣三尺以門中視雖夜如晝向鏡  
語其中影應之韓房長一丈垂髮於膝人見如神明  
矣能以丹沙畫左右作日月盈缺之勢如真馬照百  
餘步內又噴氣作雲雨

二十六年王處昆照臺侍臣萇弘辯巧如流人以萇  
弘諂媚遂殺之流血成石又云成碧不見其尸

師曠者出於晉靈之世以主樂妙辯音律著書萬篇  
人莫知源爾至晉平公以陰陽之術顯於當世乃薰  
目作瞽者以絕塞衆慮考鍾呂以定四時無差毫釐

耳

老聃在周末居返景山與世人絕迹惟有黃髮老叟  
五人乘鴻鵠或衣羽毛隨方色耳出於頂童子方面  
玉潔手握青筠之杖與聃共譚天地之教聃退迹爲  
柱下史求天下服道懷奇之術四海名士莫不爭至  
有浮提國進神通善畫二人作老作少隱形則出影  
聞聲則藏形肘間有金壺四寸上有五龍之捻封以  
青泥中有墨汁若淳漆西衣多成文畫石成篆科斗  
字說造化人倫之治有老子撰道經十萬言皆寫以

王牒綿以金繩貯以玉函晝夜精勤形勞神倦及壺  
汁盡二人剖心滴血以代之或鑢骨取髓作膏採其  
懷有玉壺中有丹藥之屑塗身則如故及經成二人  
不知所往

師涓者山衛靈之世能寫歷代之樂善造新曲有四  
時之樂春有雜鴻去雁蘋生之歌夏有明晨集泉朱  
華流金之調秋有商飈白雲落葉吹蓬之曲冬有凝  
河流陰沉靈之操此四氣之聲奏於靈公公情緬心  
惑忘於政事遽伯玉趨堦諫曰此雖發揚氣律實爲

沉惑公乃去新聲而親政事師涓悔其乖於雅頌乃  
退而隱迹伯玉攀其寶器恐後世傳之歌淫滅世代  
遠矣惟紀篇意而已

宋景公之世有善星文者以上大夫之位處於層樓  
望氣設以珠食施以寶衣食有渠倉之鳥以桂髓塗  
之爨以蘭蕪每食異香至於臺上忽有野人披

髮而叩關聞國君好陰陽五術之秘公乃延於崇堂  
語則及未來之兆建以經往之事萬不失一夜則觀  
星望氣晝則執筭披圖不服寶衣不甘奇食公謝曰

國之喪亂非君何以補之於是賜姓子氏名韋春秋  
因生以賜姓緣事以顯族乃號星氏至六國未著陰  
陽之書

輪吳爲傭保又有二美女一名夷光二名循明以貢  
吳吳處以椒華之房以細珠爲簾朝下蔽日夕捲待  
月二人靚粧於簾幌之內窺者無不動其心魂皆謂  
神人目若雙鸞在輕霧色若綠水映秋渠王乃玩惑  
怠於政事越兵入乃抱二人以巡吳苑越見二人在  
樹下皆云神女望而不侵

脚氣集

天台車清臣

潘默成磨鏡帖甚佳帖云僕自喻昏鏡喻書爲磨鏡藥當用此藥揩磨塵垢使通明瑩徹而後已倘積藥鏡上而不施揩磨之功反爲鏡之累故知托儒爲奸者曾不若愚夫愚婦也

孟子集義章先儒被孟子說捫苗處多了將謂是告子助長然告子正是不曾集義惟恐助長只待義自外來襲所謂不得於心勿求於言勿求於氣者也孟



子必有事了方說勿正勿忘了方說勿助長耘苗了  
方說揠苗次第甚明但其說揠苗處詳人遂謂孟子  
以揠苗之戒爲重掉了告子真病

趙幾道說誠無爲幾善惡作一圖上寫一誠字直落  
寫箇善字偏旁一絲寫箇惡字以惡是誠之庶孽善  
是宗嫡友人沈可亨疑之以問此疑甚善幾道自謂  
可勝胡氏同體異用之說不知其尤非也且如喜怒  
哀樂未發謂之中當其未發只是至善至於發時如  
有中節與不中節中節者是不走作這中不中節者

是走作這中却不是這中先生箇中節旋生箇不中  
節如水之清有以濁之不是當初帶得這濁來若是  
庶孽須亦從他身上出不枉屈

周禮冬官不以散在諸官之中而地官尤多自簡帙  
散亂俗儒補緝不得其說不識周禮所謂天官地官  
者是如何遂以日野諸職並附地官如此則馮相寶  
章挈壺之類皆可附天官耶金叔明作周禮十疑十  
答乃意勤甚予遂授以俞氏復古編復古編者蓋著  
冬官不以將周禮舊本再一證之叔明得之甚喜董

華翁又辨復古編之不可憑此是忠厚不欲輕動古  
書之意予後來會叔明云復古編甚是某又與之考  
有一證據甚佳周官三百六十今已存三百五十只  
亾其十豈可謂冬官亾也此說痛快但冬官之不亾  
只可說數句證以地官使人自曉自推足矣俞氏乃  
斷定櫟置此在天官此在地官此在某官以二千餘  
載以下之凡夫而妄意聖人之述作其不審如此蓋  
其淺淺之爲人偶得此說喜不自持不覺成此其爲  
此說之累多矣

程子春秋傳春王正月正月非春假天時以立義此  
說至正張主一乃以爲非却又云天統建子之月陽  
氣潛萌於黃鍾之宮此天之所以爲而萬物之所由  
生也獨不謂之天統之眷乎正不必如此巧說

漢時士大夫奏事宮中要便人來只是不到後庭所  
以公孫弘燕見武帝或時不冠又不冠不見汲黯此  
猶是周禮古意自武帝以宦者典章奏而士大夫遂  
疎後來門禁森嚴全隔絕矣於是親宦官宮妾之時  
多親士大夫之時少

詩誰謂荼苦其甘如薺荼苦菜也周禮掌荼以供喪  
事取其苦也東坡詩云周詩記苦荼茗飲出近世乃  
以今之茶爲荼茶今人以清頭目自唐以來上下好  
之細民亦日數枕豈是茶也茶之麓者是爲茗

載師國宅無征園廬二十而稅一近郊十一遠郊二  
十而三甸稍縣都皆無過十二惟其漆林之征二十  
而五此太宰九職之征一曰邦中之賦二曰四郊之  
賦三曰邦甸之賦四曰家削之賦五曰邦縣之賦六  
曰邦都之賦與關市山澤幣餘通而爲九而以財賄

爲歛與助徹之法迥不相干而蘇老泉乃謂周自以十一名其實取於民者自重漸輕而至十一耳蓋惑於前面以某田任某地而以爲田制也予嘗曰遠郊四方井甸稍縣都九十六萬井王畿通百萬井而九十六萬爲十二是周人廢夏商之制厚取於民而孟子爲妄言矣蓋司徒田制而載師閭廛之制也國之閭廛邦中之賦是也郊甸削縣都之閭廛郊甸稍都之賦是也載師六甸相承上旣言國故閭廛不言國上旣言閭廛故甸稍縣都不言閭廛也其日以廛里

任國中之地以場圃任園地卽此見國宅無征園廩  
二十而稅一是二句相承下文皆相承其曰以某田  
任某地者田制定後方就田之中而起地之稅耳予  
有辨說不詳載古人重本抑末故地稅常重而田租  
常輕

公及邾儀父盟于蔑程子曰盟誓以結信出於人情  
先王所不禁也後世屢盟而不信則罪也諸侯交相  
盟誓亂世之事也此語極其完全是與不是皆已著  
明胡氏傳刑牲歃血殆不獲已卽位之初而汲汲以

求焉惡隱公之私也此語已是傷巧張主一云書公之及盟以譏其徇習俗之私而不出於由衷之信魯邾之好卒不能以久成尤巧矣聖人春秋寫一句在這裏則物無遁形如何有許多工夫譏人聖人固有特筆處却不在此只消寫一句是非自見私意不公也見盟長亂也見好不久成也見

天王使宰咺來歸惠公仲子之賵寫此一句便見賵諸侯之妾毀壞綱常更不必問其他書法天王兩字春秋方是此第一句書王室事之不可不書天王繼



天爲王舉動如此言外自可見春秋只消得如此平看

張主一有春秋集註集傳予未嘗見忽得本於瑞州守董正翁蓋其刻在瑞州見惠新本也病中未及看偶華翁歸自朝盛稱之方能畧看中間義理自善但春秋一書實實判斷不得文公論之詳矣除非起孔子出來如范明友好再生說當時之事與所以褒貶去取之意方得今作集註便是要實實判斷了此照語孟例不得語孟是說道理春秋是紀事且首先句

便難明了惠公仲子不知惠公之仲子耶或惠公同  
仲子耶尹氏卒一邊道是婦人一邊道天子之世卿  
諸儒譏世卿之說自是明訓恐是舉燭尚明之論理  
自是而事則非也此自是一說至於三統之說予嘗  
以告華翁華翁亦以爲未穩暨再閱至夫人子氏薨  
忽云不書葬者婦人從君故君存則葬禮未備待君  
薨而合祔也本朝后雖先崩必俟合葬於山陵蓋古  
之遺制與此說可駭此看先儒之言不分曉而又  
不曉事也穀梁云不書葬夫人之義從君者也程子云

公在故不書葬於此見夫婦之義矣此不過所尊有嫌遂不書葬耳安得待君薨而合祔也本朝后先崩必備葬禮而葬但未歸太廟而神主享于別廟暨帝崩既葬然後以神主合歸于太廟典故甚明安得如張氏之言也魏徵謂太宗曰臣以爲陛下望獻陵若昭陵臣固見之是太宗后之塋而陵名且定張氏何不知之

淵明送一僕與乃子助其薪水之勞而曰彼亦人子也見得淵明知道王褒僮約無此事以文爲戲後世

虐用其下者乃以爲口實可嘆也

白樂天長恨歌敘事詳贍後人得知當時實事有功  
紀錄然以敗亡爲戲更無惻怛憂愛之意身爲唐臣  
亦然知春秋所以存魯之法便是艸茅亦將不思蓋  
祖父與身皆朝廷長養不可謂艸茅不知朝廷苦之  
此說不是不容臣不做此語但有惻怛憂愛之心語  
言是重

程子曰盡其心者知其性也釋氏所謂識心見性是  
也若存心養性一段則無矣愚謂釋氏但能存其無

用之心養其無實之性却不盡心知性也

康誥酒誥梓材斷然是武王封康叔之書不但朕其弟小子封之可證也管蔡以武庚叛幸而獲乎是當時至大至重之事更不引一句分明是武王時誥命然此一段事後人說不得並無考慮其有考慮皆成王也鄭康成不足信太史公亦是成王太史公又不足信左傳載衛祝鮀之言亦是成王方道兄弟皆武王所封而周公封魯又是成王詩頌分明載也且當時若已封武庚則妹邦無得封衛若已封衛則邯鄲

衛無得與武庚及三  
監豈武王當時已作誥命將封  
康叔又思以舊地存  
武庚旣平武庚成王始宜武王  
之誥以封康叔耶不  
可曉也

望崖錄

吳郡王世懋

李將軍廣出獵見草中石以爲虎也射之飲鏃後知  
是石頻射不入李將軍射非勇于前而弱于後也前  
當其志堅也王右軍半醉作蘭亭禊序用鼠鬚筆書  
繭紙妙絕醒後更寫百十本終不相及王右軍書非  
工于前而拙于後也前當其趣合也嗚呼學道者可  
思過半矣能以李將軍射虎之志求道道何患不聞  
以王右軍醉時之趣採真真何患不得神來乎神來

平未易爲俗人言也

毋輕生之徒無養生之厚無求生之過

揣摩傳會爭先巧中世以爲能吾非不能也但能之而不爲爲之而不願耳能之不爲蒲籬猶在爲之不願幾乎漏隄矣自今以往願一切不願必不爲一切不爲如不能非曰能之庶以自勗

修短有數早定于有生之日飛仙至人非凡福可企吾必曰長生卽妄也要使生時胸中空濶灑落去日分曉自在朝聞夕死本無限量亦無執着是在勉之



而已

凡人有少疾病志願常收神慮常靜逮夫病愈氣揚  
便多馳騫飲醇擁歡遺事拒客位高意滿望門難入  
鮮有不招憾者至于臥病之人卽有疏節人多恕之  
是知疾病不幸也然而亦有入焉何者以疾病之心  
修身則寡累以疾病之人待人則寡怨

子之所慎齋戰疾予中歲懺悔因病思玄實借三言  
以爲日課晨起焚香誦經夜則冥心靜坐絕房室滯  
滋味嘗使清淨虛明之氣在躬此吾之日事於齋也

敢不慎歟晝之所交夜之所夢凡功名貨利聲華嗜好機械牢籠好勝憤恚等念隨有發處必以慧劍斬之務使本來面目古德訓言常爲勝主此吾之日事于戰也敢不慎歟稟氣素弱作用小過病態立見朝夕起居事事樽節減省不令快意適可而止卽觀書探道不損夜氣隨事應接不涉躁心此吾之日事于疾也敢不慎歟

嘗謂道眼觀世本無榮辱就世間法言之受辱猶是實際榮與吾身了不相關如屈膝階下候人門外不

無邑黻而受跪拒客之人有何享受然則浮榮之過  
目不必知道者已能輕視之矣是以古之君子有求  
免辱無求致榮

問今雖覺得是畢竟作何修曰但患不能覺覺得自  
然修問至道無爲宗修持安能到曰但患不能修修  
得自然無又問希夷中有物安得但云無曰但患不  
能無無得自能有

余中年來似於寄之來去頗知一二但其下手處似  
與郭言先後稍異卽如官之榮辱必先見得它人榮

者與我了無欣羨一旦偶被之躬於我若無干涉先  
此心一遇退辱便如故境易處又如日用間游飲  
懽合之事通覺得倘然應迹嚼然無味便好塊然獨  
坐無悶益從不荒處下手有巴鼻不樂處自然得無  
也曾爲醒樂翁賦詩云定須美酒始足樂但醒便到  
愁城邊意正如此要之理無二致各於入頭有先後  
耳

坐右箴云染愛染情勞神勞形有一于此必伐其生  
病則缺心愈則廣營蠢茲凡民終墮無明四生銘云

勿以娛生敗趨向勿以尊生墮色相勿以貪生廣祈  
禱勿以憂生作煩惱皆病中自課實學也

王摩詰白樂天皆以詩人早有盛名晚而悟道然右  
丞逃禪世多知之不知白傳所得之更深也大都摩  
詰從寡欲入故多矜潔清淨樂天從知足入故多廣  
大自在學人晚年學道未離遊戲當以陶淵明王摩  
詰常蘇州白樂天四節時翫可也

燕閒錄

雲間陸深

杜詩風吹滄江樹雨洗石壁來自是以寔字作虛字  
用樹樹立之樹晦翁以爲誤字欲更爲去對來字恐  
未然東坡有美堂詩云天外黑風吹海立浙東飛雨  
過江來祖此但長公不若老杜之簡雅遠矣

山西地寒予六月初巡五臺嶺頭澗底層冰積雪皚  
皚尚衣薄綿再加一綿適可當憲副陳汝止伯安兵  
備代州爲予言北上雁門更寒雲中更寒然煖木實

產其間此陰中陽也

水潤下情也性最上故雨露自高降而露又高凡水失其情則潰決之禍甚烈性上故也

聞喜之裴自後漢裴輯而下裴北倉村數里間凡五十二人皆尚書侍郎國公將相亦宇內之罕有也

戴石屏詩麥麩朝克食松明夜當燈此是山西本色語溪山老松心有油者如蠟山西人多以代燭謂之松明頗不畏風

一產而三有至四者皆陰氣盛而母道壯也

唐制以禮記春秋左氏傳爲大經詩周禮儀禮爲中經易尚書春秋公穀傳爲小經當是以簡帙繁簡爲次第爾

李勣字定臣唐渤海王奉慈七世孫好學明六經舉進士就試禮部吏唱名乃入定臣耻之遂隱居陽羨常惡元白詩體纖艷乃集詩人之類古斷爲唐詩以譏正其失其識超卓矣惜其集不傳於世無由考觀焉

隋文帝開皇十三年十二月八日勅廢像遺經悉令



雕撰此印書之始又在馮瀛王先矣

序記之系銘詩本於漢書諸贊如蒯通等贊云昔子  
輿謀桓而魯隱危樂書構郤而晉厲弑豎牛奔仲叔  
孫卒郈伯毀季昭公逐費忌納女楚建走宰嚭譖胥  
夫差喪李園進妹春申斃上官訢屈懷王執趙高敗  
斯二世縊伊戾坎盟宋痤歿江克造蠱太子殺息夫  
作姦東平誅若滅去首一二字分明一篇七言古詩  
少韻爾若東方朔贊云首陽爲拙柱下爲工飽食安  
步以仕易農依隱玩世詭時不逢則成韻語矣

世稱韓魏公之功業甚偉閭古堂記所謂幅巾坐嘯恬然終日子之所樂惡有旣乎觀此則知其所本范文正公特舉中庸以示張子厚皆在濂洛未興之前真豪傑哉

禹貢八州皆有貢物而冀州獨無之冀卽今之山西土瘠天寒生物鮮少蓋自古爲然

石撰平定州人靖難處節州志載撰洪武中爲寧府左長史太宗靖內難諸郡縣皆下在江西城獨爲守備上怒攻拔之得撰不爲屈遂支解而歿此恐

失實按寧始封乃今之大寧與 太宗同起兵渡江  
因不之國江西之封乃在永樂中安得撰守備江西  
伏節此當是約兵之日在大寧盡節不當繫之江西  
耳

綱目凡例曰凡以國與人者子弟曰傳他人曰讓此  
義恐未精孔子稱秦伯三以天下讓豈他人乎堯傳  
之舜舜傳之禹豈子弟乎予謂以國與人者有正有  
變當具二義乃備

凡天下混一爲正統恐亦未精先輩方正學先生嘗

論之又似過繁予意欲析而言之蓋有正而不統者  
若周之東遷是已晉宋之南附之統而不正者若秦  
晉隋元是已新莽附之三代而下漢興甚正唐次之  
宋初與魏晉無大相遠後來功德過之賢人輩出惜  
乎輿地不完而政教號令未徧於海宇不應混一之  
義由是觀之惟我 皇朝功德上宇有漢唐之所不  
及者史家正統宜曰漢唐 明而宋不得與焉  
晉水澗行類閩越而悍濁怒號特甚雖步可越處輒  
起濤頭作澎湃源至高故也夏秋間爲害不細以無

堰竭之具爾予行三晉諸山間嘗欲命緣水之地聚  
諸亂石倣閩越間作灘自源而下審地高低以爲疎  
密則晉水皆利也有司旣不暇及此而晉人簡隋亦  
復不知所事甚爲可恨閩諺云水無一點不爲利誠  
然亦由其先有豪傑之士作興後來因而修舉之遂  
成永世之業故予謂閩水之爲利者盈科後進晉水  
之不爲利者建瓴而下爾

石守道作怪說以議楊大年之文體吾鄉國初有  
王葵先生字宗常作文好以些楊庶夫之制作文章

體裁固常有辯妖怪之目誠過矣

樂府中有蘇幕遮乃高昌婦人所戴油帽高昌西域國西州也

馬端臨論圩田曰今之田昔之湖徒知湖中之水可涸以墾田而不知湖外之田將胥而爲水也此數言極盡吾鄉洊湖之利害當大書深刻以示愚民之嗜利者

沈存中筆談載兵部員外郎范祥爲鈔法令商人就邊郡入錢四貫八百售一鈔至解池請鹽二百斤任

其私賣得錢以實塞下省數十郡搬運之勞此卽今日閭中給引之始

北魏延興三年秀容郡婦人一產四男四產十六男秀容今太原之忻州

曆家大抵以漏刻極長於六十極短於四十嘗聞前輩言惟正統己巳官曆晝刻三十九夜刻六十一以爲陰過故有土木之變元授時曆則長極於六十二刻短極於三十八刻以爲驗於燕地稍偏北故然外  
國有羔羊碑示熟而天嗣者曰也又平五六二十八

刻而已豈漏刻隨日因地有不同者如此初不全繫於陰陽之消長也

宋南渡諸將韓世忠封斬王楊沂中封和王張俊封循王異姓真王俱饗富貴之極而俊復善殖產其罷兵而歸歲收租米六十萬斛今浙西豈能着此富家也一隅偏安而有此宋安得復興耶

今歲庚寅官曆九十十一連三月皆大盡冬至節在二十三日巳酉申正一刻明歲置閏乃在六月曆法莫問來年閏便數冬至剝剝謂餘也今年十一月大



盡則冬至所餘正七日而閏在六月何與氣朔生閏  
豈所謂差一日者耶

開中今古錄

四明黃浦言

宋太祖建隆庚申受禪後聞陳希夷只怕五更頭之言命宮中轉六更方鼓嚴鳴鐘太祖之意恐有不軌之徒竊發于五更之時故終宋之世六更轉于宮中然後鳴鐘殊不省庚更同音也至理宗景定元年歷五庚申越十七年末宋亡而希夷五更頭之數信矣到元朝廷祐七年庚申而至正帝生帝乃宋少帝趙顯子詳見稷錄

大一兵入燕都遁去當時人只

呼庚申帝觀劉尚賓集庚申帝大事記是也後方號  
順帝云由此觀之與宋祖命轉六更之言蓋信數之  
不爽

北狄稱銀曰蒙古胡元之先國號蒙古者因之號  
國曰金乃以銀號其國也後歷世祖方改號元

世人稱生辰曰誕辰曰華誕此誕字因詩經誕生后  
稷而云然殊不知誕者發語詞也今以稱誕辰似無  
意義但古今稱謂既久奈何亦識一得之愚云爾

元順帝有一象宴群臣時拜舞爲儀 本朝王師破

元都帝北遁徙象至南京一日上設宴使象舞象  
伏不起殺之次日作二木牌一書危下如象一書素  
不如象掛於危素左右肩由是素以老疾告乃謫含  
山縣尋卒今墓在焉

宋時避廟諱甚謹太祖之諱匡胤卽改匡衡作康衡  
英宗之諱宗實周濂溪改實作順欽宗之諱桓改陶  
桓公作威公孝宗之諱昀西山本姓慎改姓作真如  
此之類甚多又如貞字般字刊本中並缺二點畫其  
謹嚴比前代不同因錄如左

子嘗讀檀弓至子思之母死子思哭於廟門人至曰  
庶氏之母死何爲哭於孔氏之廟乎子思曰吾過矣  
遂哭於他室註云伯魚卒其妻嫁於衛之庶氏以予  
論之伯魚先孔子卒時年五十其妻之年必與之相  
似且上有聖人爲之翁下有賢爲之子况年已及  
艾矣何得再嫁庶氏此予之疑已久茲觀瞿宗吉所  
著香臺集有易安樂府之目引漁隱叢話云趙明誠  
清獻公之子妻李氏能文詞號易安居士有樂府詞  
三卷名漱玉集明誠卒易安再適非類既而反自有

啓與蔡處厚學士猥以桑榆之晚景配茲駟僊之下  
才見者笑之此宗吉所以有清獻名家阮運垂羞將  
晚景對非才之句子歎易安翁則清獻爲時名臣夫  
則明誠官至郡守亦景薄桑榆何爲而再適耶事類  
檀弓所記故錄之

奉化應方伯履平登洪武庚辰進士除授福建德化  
知縣三年考滿吏部試論一篇文雖優而貌頗侏儒  
不得列乃題詩部門之前云爲官不用好文章只要  
鬚鬚及胖長更有一般堪笑處衣裳襠得硬綳綳末

不書姓名聞者以此呈冢宰冢宰曰此必應知縣也  
取其文覽之果高次日奏陞考功司郎中越三年出  
爲常德知府又三年陞貴州按察使仕終雲南左布  
政使然一詩之感動於人而冢宰亦知過能改皆可  
以示後故錄之

宣德中先和司訓南昌爲崔太守彥俊題予昂胡馬  
圖曰塞馬肥時首宿枯鷄官早已着貂狐可憐松雪  
當年筆不識檀溪寫的盧胡祭酒謂此含蓄褒貶  
誦之不輟

世儒論陰陽激而爲雷何神是豈知一物必有一神  
乎許敬觀明州衛兵也事母孝一日拉十兵駕船販  
私鹽至郡江北渡忽霹靂一聲挈人船上江岸十人  
皆震死獨敬觀昏絕中默念我死了我母靠誰卽有  
人援之去死所三丈地而甦惟雷火燎髮半禿母歿  
卒於屯所需之有神如此

宣德間大父南山先生與慈谿王公來俱以教職同  
薦入憲臺王巡按北直隸時于少保謙任兵部侍郎  
欲舉王自代附書問消息大父復詩云出處雖同調



睽離各一方只因交最厚常是念難忘賈誼曾陳策  
曹參解促裝明年二三月延佇看翱翔西陽先生甚  
奇此詩王在職幾年陞山西參政大父未滿六年  
受勅任廣西督學命事常奏保明經章致和等六  
人堪任教職不報作詩云意氣日相信交游四十年  
自甘楊炯後誰意祖生先散地宜藏拙明時肯蔽賢  
殷勤一封疏消息竟茫然宜出處窮通有命存焉  
爾

元薩公天錫常有一詩迷濬天淵入朝地濕厭聞入

竺雨月明來聽景陽鍾聞者無不膾炙惟山東有一  
叟鄙之公以素慙意特步訪問其故叟曰此聯措詞  
固善但聞字與聽字一介耳公曰當以何字易之叟  
徐曰看天竺雨公詰其看字叟曰唐人有林下老僧  
來看雨公俯首拜爲一字師

宣德初先祖在南昌題春帖於學門云學冠西江  
郡仰詩書之府道宗東魯四方推文獻之邦方伯孟  
公見而請題藩司外門先祖以堂堂藩府襟三江而  
帶五湖濟濟官僚順四時以宣八政呈公卽命刻之

至今不易

正統己巳先祖在湖臬與巡撫侍郎王公一寧督漕  
湖南聞土木之變公與先祖哭於岳陽驛日不意今  
日亦見此事後 景帝卽位有 詔開讀於戲後云  
云先祖語王公一寧曰似虧王言體公曰如何而後  
可先祖擬以對云於戲漢高帝誤圍白登非無奇計  
周宣王薄伐玁狁正在 興宜宗室休戚之相關實  
天下臣民之攸望詔告天下咸使聞知公稱善後公  
以語徐武功徐亦擊節嘆焉

元末永嘉高明字則誠登至正四年進士歷任慶元  
路推官文行之名重於時見方谷珙來據慶元避世  
於鄞之櫟社以詞曲自娛因劉後村有死後是非誰  
管得蒲村聽唱蔡中郎之句因編琵琶記用雪蔡伯  
喈之耻其曲調拔萃前人入 國朝遣使徵辟辭以  
心恙不就使復命 上曰朕聞其名欲用之原來無  
福旣卒有以其記進 上覽畢曰五經四書如五穀  
家家不可缺高明琵琶記如珍羞百味富貴家其可  
缺耶其見推許如此今流傳華夷不負所學云

綠雪亭雜言

清江敖英

蜀臺清戎官舍之由有亭焉環亭有竹伯餘竿茁叢  
樾宛若玉人娟娟叅焉侍焉拱焉揖焉每曦馭亭午  
飄風徐來則綠蔭葳蕤浮連几席宛若陰洞崛岉之  
間洒淅飛雪涼沁毛骨先輩好奇顏其楣曰綠雪亭  
云予自公退食嘗來亭中與此君相對翛然有吏隱  
之適而忘其倦遊於蜀天萬里之遠也欣然會心或  
追憶見聞或竊有評議輒隨筆而雜記之無譏次焉

越數月而脫稿乃以亭標題志所寓也第愧言不居  
要枝葉空疎作我弦韋莫之或益然較之博奕庶其  
賢乎且將藉手以見君子

或問昔人謂東坡不喜史記信然乎愚曰東坡何嘗  
喜史記也子長史筆高視萬古稍知文墨蹊徑者  
莫不醉心況東坡乎觀其記季氏山房曰余猶見老  
儒先生自言少時欲求史記不可得幸而得之親自  
手抄日夜誦讀惟恐不及夫既稱老儒先生愛慕史  
記矣寧有不自好耶又觀其在海上與友人書曰讀

此抄得漢書一部若再抄得唐書便是貧兒暴富也  
夫漢書唐書皆憲章史記者也猶抄錄慶幸如此況  
於史記又寧有不自好耶且荆公嘗稱東坡表忠觀  
碑似史記諸侯王年表夫既法其體爲文矣非潛心  
領畧者能若是哉

晉大夫智悼子卒未葬平公飲酒鼓鍾杜蕢曰子卯  
不樂智悼子在堂其爲子卯也大矣愚按桀以乙卯  
日死紂以甲子日死謂之疾日蓋忌而惡之也故君  
不舉樂夫蕢之諫平公善矣竊疑子卯不樂非明王

之禮也凡國有恤有忌不樂禮也獨夫死誰不甘心  
胡爲而不樂耶曾不思桀紂以是日死固可疾湯武  
以是日興獨不可幸耶況與其疾桀紂於死亾之日  
孰若卽其所以致死亾者而疾之與其疾厥致死亾  
者又孰若卽湯武所以興王者而師之則勸懲具焉  
善惡幾焉故曰子卯不樂非明王之禮也

愚讀寇萊公斥丁謂拂鬚事竊謂萊公過矣謂也愴  
人知敬事公實難而顧斥之拂情甚矣夫敬且斥使  
多行無禮將若之何吾聞古之敬賢有進履結褻組



割牲操几杖擁幣馭車者曾是拂鬚爲媚耶公於此  
宜謝而不宜斥也夫君子待小人宜不惡而嚴公無  
乃惡而嚴耶異曰到海之行怨根於此矣豈獨孤注  
者爲哉

或問鵬冠子云中流失船一壺千金何謂也愚曰壺  
乾瓠也遇水患負之可以不溺蓋言物之賤者時乎  
獲濟其爲物也弘矣昔孟嘗君淹恤於秦賴鷄鳴狗  
盜之士獻裘出關而脫虎狼之口金匱之陷汴京也  
邀二帝如青城當是時也使得鷄鳴狗盜之士而用

之必能奪翠華而宵遁何至北轅哉卽此觀之壺也  
惡乎不千金重耶

郭林宗葬母徐孺子往吊之置生芻一束於墓前衆  
不知其故林宗曰此必南州高士徐孺子也詩不云  
平生芻一束其人如玉吾無德以堪之恩按今人用  
束芻故實多以爲美死者觀無德以堪之言又似美  
生者蓋古禮知生者吊知死者傷孺子之來吊也非  
傷也夫吊之爲言唁慰之意也而美德焉意不左耶  
且吊人母死而美子德於吊意無涉林宗之解無乃

郢書燕說之類耶惜乎當日會葬諸賢無有親問之者

高孝基一見房杜奇之而耗以子孫愚謂子孫賢不肖成立覆墜天也豈他人所能錮鑄哉况房杜他日亦不能保子孫不蕩敗門戶又安能庇他人子孫哉愚謂孝基於是乎不智夫大臣以人事君者也當國之樞得賢焉曾不社稷是念顧煦煦焉私之子孫愚謂孝基於是乎不忠

或問沛公斬蛇神母夜哭信然乎子曰適然遘蛇而

斬之無足惟者乃若神母夜哭竊疑沛公喉老嫗爲之又喉人告焉使神其事以鼓西向之氣耳夫鈞謂之帝子也在彼爲蛇在此爲沛公何擬倫之不類耶雖然其詭道也假神道以聳動人心尤兵家秘密之術觀田單守卽墨而天神下降陳勝首禍而魚腹獻丹書類可槩見

陳仲舉不掃一室或問之對曰大丈夫當掃除天下安得一室乎夫言大而誇此乃仲舉疎漏處昔衛武公九十之年猶以洒掃庭內自警蓋克勤小物則遠

大可期矧東京之季宦官執政濁亂海內其深根固  
蒂可易掃乎夫鷲鳥將擊必匿其形願出臣章宜示  
宦者此何說也仲舉疎漏如此宜其有侯覽曹節之  
及也

西漢末年災異頻仍金鐵之類有飛動者梅福以爲  
陰盛陽微之徵也愚按金鐵陰之質也而飛動者陽  
之氣也夫陽氣旣微宜飛之類失常矣而非飛之類  
顧乃感陽氣而飛何哉蓋陰氣極盛故能乘微陽之  
氣以妄動而陽不能制也猶姦臣之強梁故能挾弱

君之權以干紀而君不能制也使陽氣盛壯則陰自安其常寧能乘之而妄動哉是時王氏釀禍咎微告變明著如此

韓魏公於小人欺已處明足以照之終不道破愚謂此正魏公德量最高處明知其欺則終莫能欺苟訐其情則激怨矣怨則不肖之心生不中傷之不已也古來豪傑敗於小人者多昧此幾噫魏公之智遠矣哉

陸象山曰天下本無事庸人自擾之愚謂庸人豈能

擾天下也哉擾天下者惟好作聰明暨大奸大惡則然觀商鞅李斯之擾秦桑弘羊孔瑾之擾漢李林甫之擾唐王介甫之擾宋謂之庸人可乎自夫斯言之川也世之庸人於凡天下之事有必至之憂叵測之禍往往以此藉口誰則肯厯杞人憂天之念哉

秦始皇坑儒說者謂設爲陷阱而殺之愚以爲坑者只是掩其不知而加害也非真掘土而爲坑也今民間訟牒亦有坑陷之詞卽是此意此坑字當作虛活字看如古云聲色溺人非真溺於水也且畫之枯非

真惜以刑也不然白起坑降卒四十萬於長平項羽坑降卒二十萬於新安設使掘土爲坑若是其廣大彼降卒寧不知之又寧肯帖然束手而就死乎

鄭國諸生訕議執政咸陽諸生誹謗君上幸而遇子產則不毀鄉校不幸而遇祖龍則便下毒手後之誦法孔子者常以此爲殷鑒何者古人居是邦不非其大夫况執政乎况君上乎孔子曰邦無道危行言孫夫祖龍無道甚於虎狼括囊自晦猶慮其及之也矧身無言責顧嗷嗷而橫議乎迨宋南渡以後此風



競雖卷堂有文畢竟何益

朝添懲此弊臥豐碑

於學官戒諸生不許言事其所以洗濯士心培養士氣如保處子意深遠矣

樵談有曰殺人者死法也庸醫殺人不死猛將殺人不死酷吏殺人不死法在乎人曰耕荒田者有九年之水耕湯田者有七年之旱耕心田者日日豐年又曰東家富財車馬接踵西家富德風雪滿門可謂警拔俊語

歐陽公族譜取法史氏之年表蘓老泉族譜取法禮

家之宗圖黃山谷族譜七世以上遠不可知疑不能明者皆畧而不著蓋慎之也後之爲譜者當錯綜而憲章焉可也

歷代縉紳之禍多肇於言語文字之激是故誹謗激坑焚之禍清議激黨錮之禍清流激白馬之禍臺諫激新法之禍禍生於激何代不然其始也一人倡之群起而和之不求是非之歸乃謹焉狂焉牢不可波其卒也不可收拾則所傷多矣

古者天子之嫡子亦稱世子如王世子聽於冢宰三

年盟王世子于首止之類是也諸侯之子亦稱太子如晉太子申生鄭太子華齊太子光之類是也西漢天子嫡子稱皇太子諸王之子稱太子如皇太子殺梁王太子之類是也魏元庶子皆稱太子如四太子莽之類是也本朝東宮稱皇太子親王嫡子稱世子郡王嫡子稱長子無嫡則立庶以長其分嚴矣舊制太子未生生而未立立而未長親王一位不之國今其出閣而於太廟司香其慮深遠矣

楊大年弱冠與周翰朱昂同在禁掖時二公皤然老矣大年每論事則侮之曰二老翁以爲何如翰不能堪正色謂之曰君莫欺侮我老老亦終留與君昂曰莫留與他免得後人又欺侮他厥後大年不及五旬而終求爲老翁亦不可得此事可以爲少年英俊侮老慢賢之戒

或問士大夫居鄉與故老讌集當序爵乎序齒乎愚曰古者一命齒於鄉而再命不齒再命齒於族而三命不齒明貴貴之義也又曰族有七十者不敢先貴

老老之仁也然觀孔子居鄉鄉人飲酒杖者出斯出矣則是老老之仁孔子亦嘗行之於鄉矣今士大夫居鄉有能然者詎非忠厚之風耶

說命曰事不師古而克永世匪說攸聞然愚觀古人行事亦有卓絕孤高震驚天下後世而非尋常步驟可得而師者如堯舜以天下傳賢伊尹放太甲於桐宮伯夷叔齊讓國而逝柳下惠深夜覆寒女魯仲連談笑却秦軍陳嬰公孫杵臼以死而全趙孤呂叔季主焚梁獄之詞傅介子矯詔而斬樓蘭汲黯矯詔而

發倉廩王霸之合河水諸葛孔明征孟獲而七縱七擒謝安石當秦兵壓境而圍棋賭墅唐太宗縱死囚四百而復來歸獄郭汾陽之單騎降韓昌黎之馴鯉魚張忠定下馬呼萬歲而靖蜀軍之叛李文靖對使焚詔寇萊公決策親征虞允文不奉命出師而成采石之功若此之類皆非庸行之常誰得而師之知此則知古之可師者常也經也其不可師者變也權也

岳家泉詠陳橋兵變有曰阿母素知兒有志外人剛

道帝無心又曰黃袍不是尋常物誰信軍中偶得之  
或曰使藝祖聞此亦將無詞以自解愚曰不然五季  
亂離斯亟天實厭之藝祖於斯時也苟以干戈取之  
亦無忝湯武之仁義顧能從容受禪廓清五十二年  
之間八姓十二君之汗濁而正有光焉衆衆以是  
誅心責備不已甚乎

宋南渡以後聲容盛而武備衰議論多而成功少直  
道不在臺諫公道不在政府明斷不在朝廷其於兩  
宮不歸八陵不祀置之於度外卒至靡靡悠悠宋社

乃屋哀哉

或問書云有容德乃大言有量也曾子曰自反而縮雖千萬人吾往矣言有勇也然則量之與勇將奚從乎愚曰凡橫逆之來祇逮我躬者固當弘量以容之如藺相如謹避廉頗之辱已李沆不校狂生之訕呂蒙正不問朝士之名可也若事于天常人紀之大當裁之以義豈容姑息如舜之誅四凶周公之誅管蔡孔子之誅少正卯漢高祖之斬丁公是皆發於義理之勇也謂之無量可乎苟徒以姑息爲事不知以義



裁之小如胡廣馮道之頑鈍無恥大如魯莊公宋高  
宗含垢包羞忘父兄不共載天之仇是皆見義不爲  
無勇也謂之有量可乎易曰包荒用馮河包荒量也  
馮河勇也知易之道其知勇與量之用乎

古人慤潤家國惟貴務農故周人以稼穡艱難爲王  
業根本秦人以力田受爵賞漢人以力田應辟舉觀  
古人制字富从田言富自田起也田从一口言有用  
之入又貴食之者寡也

長沙有朝士某者還鄉意氣滿盈賓至則鼓吹喧闐

里中有執友來謁之朝士曰翁素好誦詩近日誦得何詩執友曰近誦得孫鳳洲贈歐陽圭齋之詩甚有味乃朗然誦之曰圭齋還是舊圭齋不帶些兒官樣回若使他人居二品門前簫鼓鬧如雷朝士聞詩嘿然明日賓至門庭寂然

趙東山垂髫有詩名里中有二執友其一因投荒過家其一以磨勘需調皆栖栖桑榆猶戀鷄肋者一日同訪東山見庭下有鋸匠解木因以命題東山口占絕句曰一條黑路兩人忙傍晚相看髮有霜你去我

來同日了虧他扯拽度時光二執友知詩意諷已  
相與感歎而去

或問古今大姦惡蟠據深固玩之不可激之不可處  
之亦有要乎愚曰當於其黨與而圖之或除其黨與  
以孤其勢所謂剪其羽翼是也或赦其黨與以渙其  
心所謂脅從罔治是也又貴察幾微而密法術是故  
得則成左袒之功失則成甘露之禍

奉天靖難之初齊黃方練上觸天怒俱罹赤族之誅  
於是有人賦詩蛾眉亭中曰一個忠成九族殃全身

遠害亦天常夷齊死後君臣薄力爲君王固首陽此  
蓋建文遺臣行遜時所作也

王稼村曰繫辭序九卦治一身天德也序十三卦治  
天下王道也

過蘓步坊賦詩曰東坡昔日此開行此地遂  
留蘓子何事章惇瘞毛骨子孫羞認是先塋愚按  
東坡投荒嶺海章惇實爲之而後世流芳遺臭乃如  
此孰謂人心無春秋哉

古人觀會通以行典禮多以三數爲制蓋三者數之

節也情文之中也達之天下可以經也故冠禮三加射禮三耦賓主相見之禮三辭三讓郊廟百神之祀致齋三日喪禮孝子三日水漿不入口喪服止於三年娶婦三月而廟見其明罰也止於三就三居其矜恤也止於三宥其黜陟幽明也止於三考其建官之極也止於三公三孤教之而賓興也止於三物數以三爲制何莫不然不及者則失之儉而固也過之者則失之奢而濫也惟其稱也故君子慎焉

中興之中字潛運之潛字韻書皆讀作去聲近見里

中學究多讀作平聲訛矣噫六書之學廢而點畫諸聲之訛寧止此哉

愚在京師見馬草中火發作陳畱縣見油簍中火發在秦州見乾蝗堆中火發在劔州見積聚油紙中火發皆濕熱遏蒸於內不得發越故鬱攸不戒其來有漸

吳中有老儒沈文卿讀書至宵分燈熒熒欲滅忽見盜在室中掬物無所得從容呼之曰穿窬君子虛勞下顧某輒有小詩奉贈乃長吟曰風寒月黑夜迢迢

孤負勞心此一遭只有古書三四束也堪將去教兒曹穿窬者含笑而去

陽節潘氏以少事僞朝爲陳情之謬孫霜崖嘗有詩曰僞朝料得非公筆不得當時墨本看霜崖意料史官竄易其詞故詠此以平反之失忠孝一揆也以李密之孝寧忍忘君而媚讐乎觀洪景盧改太極圖說首語則僞之一字出於史官之曲筆或然也

生名死諱周制也周人以諱事神名終將諱之然臨文不諱近世士大夫文字中稱生者之名亦曰諱某

非禮也

近見一種文字險澁其語以爲奇僻惟其字以爲古  
隱晦其意以爲深突兀其體以爲高其志益以盤庚  
爲古文之鼻祖而淺視史記漢書以樊紹述爲古文  
之宗子而下視韓柳歐蘇鯨吞鰲扑牛鬼蛇神瑤翻  
碧甌鬼眼傾耳揮霍自恣居之不疑噫弊也甚矣

提學彭雲用嘗語予曰君子提筆撰文字凡是非毀  
譽之間不宜草草恐不其然終當噬臍予退而思之  
如陶穀悔作禪詔孔文仲悔作伊川彈文朱文公悔



作紫岩墓碑陸放翁悔作南園記姚雪坡悔作秋壑  
記李西涯悔作玄明宮記諸公當日無乃失之草草  
或者亦有不得已而然乎

東坡試刑賞忠厚之至論有曰當堯之時皋陶爲士  
將殺人皋陶曰殺之三堯曰宥之三故天下畏皋陶  
執法之堅而樂堯用刑之寬考官得之喜甚他日問  
其出處東坡笑曰想當然爾遂相傳爲笑愚按東坡  
斯言非無稽臆斷也在文王世子曰公族有罪有司  
討之公其死罪則曰某之罪在大辟公曰宥之有司

又曰在辟公又曰宥之有司又曰在辟三宥不對走出致刑于甸人卽此而觀東坡之意得非觸類於此乎

同年楊宗喬尹新鄉質任峭直與人議論不能下氣監臨者惡其不遜同列又從而交構其間勢如騎虎不可收拾一日桂古山過之宗喬告以故古山曰譬如對奕且饒一着譬如爭路且退一步便無事矣宗喬惕然謝教告改教職

同寮鄺子元由翰林補外十年餘矣不得賜環嘗陀

係無聊遂成心疾每疾作輒昏憤如夢或發譫語有時不作無異平時或曰真空寺有老僧不用符藥能治心疾予元往叩之老僧曰相公貴恙起於煩惱煩惱生於妄想夫妄想之來其幾有三或追憶數十年前榮辱恩讐悲歡離合及種種閒情此是過去妄想也或事到眼前可以順應却乃畏首畏尾三番四復猶豫不決此是見在妄想也或期望日後富貴榮華皆如其願或期望功成名遂告老歸田或期望子孫登庸以繼書香與大一切不可必成不可必得之事

此是未來妄想也三者妄想忽然而生忽然而滅禪家謂之幻心能照見其妄而斬斷念頭禪家謂之覺心故曰不思念起惟患覺遲此心若同太虛煩惱何處安腳又曰相公貴恙必原於水火不交何以故凡溺愛冶容而作色荒禪家謂之外感之欲夜深枕上思得冶容或成宵寐之變禪家謂之內生之欲二者之欲綢繆染着皆銷耗元精若能離之則腎水自然滋生可以上交於心至若思索文字忘其寢食禪家謂之理障經綸職業不告劬勩禪家謂之事障二者

之障雖非人欲亦損性靈若能遣之則心火不至上炎可以下交於腎故曰塵不相緣根無所偶返流全一六用不行又曰苦海無邊回頭是岸子元如其言乃獨處一室掃空萬緣靜坐月餘心疾如失予在汴臺間子元道其詳且曰禪悅可治心疾吾輩姑取節焉可也

春風堂隨筆

雲間陸深

世傳花卉凡以海名者皆從海外來理武當然予家  
海上園亭中喜種雜花最佳者爲海棠每欲取名花  
填小詞使童歌之有海紅花海榴花更欲采一種爲  
四闌累年而不得辛丑南歸訪舊至南浦見堂下盆  
中有樹婆娑鬱茂問之曰此海桐花卽山礬也因憶  
山谷賦水仙花云山礬是第梅是凡但白花耳却有  
歲寒之意

本朝畫手當以錢塘戴文進爲第一 宣廟喜繪事  
御製天縱一時待詔有謝廷循倪端石銳李在皆有  
名文進入京衆工妬之一日在仁智殿呈畫文進以  
得意之筆上進第一幅是秋江獨釣圖畫一紅袍人  
垂釣於水矣畫家惟紅色最難著文進獨得古法入  
妙 宣廟聞之廷循從旁奏曰此畫甚好但恨鄙野  
爾 宣廟和之乃曰大紅是 朝廷品官服色却穿  
此去釣魚甚失大體 宣廟頷之遂揮去其餘幅不  
視故文進在京師頗窘迫宋王士元畫武王誓師獨

夫崇飲圖識者以爲精慮入神與六經合孫四皓進  
之天子下圖畫院品第高文進妬之定爲下品止賜  
三十縑古今忌才雖曲藝亦然可資浩歎文進名亦  
偶同

今世所用摺疊扇亦名聚頭扇吾鄉張東海先生以  
爲貢於東 永樂間始盛行於中國予見南宋以來  
詩詞咏聚扇者頗多予收得楊妹子所寫絹扇面摺  
痕尙存東坡謂高麗白松扇展之廣尺餘合之止兩  
指許正今摺扇蓋自北宋以有之倭人亦製爲泥金



面烏竹骨竟貢出自東 果然

天地開闢日月重光遭遇際會畢力遐方將掃羣穢  
還過故鄉肅清萬里總齊八荒告成歸老待罪舞陽  
此司馬宣王過溫歌宜入詩準

北齊文宣天保七年築長城東至於海前後所築東  
西凡三千餘里率十里一戍其要害置州鎮凡二十  
五所是役頗 年又於長城內築重城自庫洛拔  
而東至於烏紇凡四萬餘里高洋備邊如此

長子羊頭山拒黍可以繫律河內葭蓼灰可以布墼

非其地則無驗今長子與河內地相連屬豈天地之氣鍾於此耶

邢子才有書甚多而不甚讐校見人校書常笑曰何愚之甚天下書至死讀不可遍焉能始復校此且誤書思之更是一適

元韶娶魏孝武帝后魏室奇寶多隨后入韶家有二玉鉢相盛可轉而不可出瑪瑙梳容三升玉縫之皆西域鬼作也鬼作卽世所謂鬼工

方言以十二生肖配十二辰爲人命所屬莫知所起

周宇文護母留齊胎書護曰昔在武川鎮生汝兄弟  
大者屬鼠次者屬兔汝身屬蛇當時已有此語北狄  
中每以十二生肖配年爲號所謂狗兒年羊兒年者  
豈此皆胡語耶

知止而后有定定而后能靜靜而后能安安而后能  
慮慮而后能得此一條自具大學始終節目亦吾道  
異端之所以分也如告子之學可謂定矣而未能靜  
禪者之學可謂靜矣而未能安惟其未能安故資於  
神通惟其未能慮故失之誕謾豈能有所得耶

製筆之法桀者居前彊者居後強者爲次要者爲輔  
參之以策束之以管固以漆液澤以海藻濡墨而試  
直中繩勾中鈎方圓中規矩終日握而不敗故曰筆  
妙此數言簡約未知誰所爲可題爲筆經

唐代宗廣德二年七月以國用不及秋苗方青卽征  
之號爲青苗荆公青苗之法雖不同其爲虐政一也  
王忠肅公綸字九臯鹽山人爲太宰時每呼二侍郎  
爲崔家尹家至今相傳以公爲朴直此字亦有所本  
蓋尊敬之詞漢稱天子曰官家石曼卿每呼韓魏公

爲韓家若今人則爲輕鮮之詞矣

仲尼之門五尺童子蓋稱五霸古以二歲半爲一尺言五尺是十二歲以上十五歲則稱六尺若嬰嬰身不滿三尺是以律起尺矣周尺準今八寸二尺四五寸豈成形體當是極言其短耳曹交九尺四寸以長準今七八五寸餘

栢松百年卽有白衣如粉本草謂之艾衲香吾鄉錢蘇先生號艾衲蓋取諸此趙文敏公號松雪乃是一琴名若艾衲香亦可稱曰松雪

昔人云讀漢書要取堂扁合作者信難得宋呂文靖題鏡湖天花寺一絕云賀家湖上天花寺一一軒窗向冰開不用閉門防俗客愛閒能有幾人來予欲取愛閒二字署山居一軒堂

今世官司各有俚語以寓譏評如在京兵部四司曰武選武選多恩多怨職方職方最窮最忙車駕車駕不上不下武庫武庫又閒又富閒他衙門中尙多惜不得其詳此語蓋自宋以來卽有之元豐時有曰吏黥封考筆頭不倒戶度金倉日夜窮忙禮祠王膳不

議判硯兵職駕庫典了潑袴刑都北門總是冤魂工  
屯虞水白日見鬼紹興後時事不同又爲之語曰吏  
勲考封三婆三嫂戶度金倉細酒肥羊禮祠主膳淡  
喫蕪麵兵職駕庫敲薑呷醋刑都北門人肉餽餽工  
屯虞水生身餓鬼本朝國子監自祖宗以來例不  
刷卷故諺曰金祭酒銀典簿正德戊寅予自編修轉  
司業時適祭酒闕予得一旨遂署印稽考錢糧其實  
空虛典簿廳至起息揭債予問之前祭酒石熊峯邦  
彥先生云自來如此余遂舉劾典簿王勳者黜之適

送供堂皂隸銀數兩至色如黑銅子笑曰正好謂之銅司業聞者絕倒

世目簿行人爲沒前程此語亦有所自柳子厚作非國語人以爲子厚平生作文得國語最深因知其短長而持之故謂子厚爲沒前程然則以夫子之道反害夫子從古已然可歎也

丘文莊公仲深漸近世最號博學強記洛陽劉少師希賢健嘗戲之曰丘先生是有一屋散錢却少一條索子文莊聞之曰劉先生有一屋索子却少散錢蓋



報之也吾聞崔同年子鍾銑云訥齋嘉話云貫如散錢一是索子

武康石色黑而潤文如波浪人家園池疊假山以此爲奇大至尋丈者絕少武康縣今屬湖州山溪間多產此石予行江南山中亦見此類有甚大者或云出海島中水洗而成文海舶取以壓風者往年入蜀自棧道過鳳縣嶺純是此石人家用作短牆有甚佳者摺皺成文而方整可坐其品格頗多惟疊雪者爲甲橫文疊起如枰有黑白層疊相間者有白石作腰帶

團者曰玉帶流小其文皆豎麻衣如人衣麻之狀錦  
犀紅黃色相間成文虎皮大文圓嵌作黃黑色麻皮  
如畫家麻皮皴海石蒼黑色面作磨頭紋鬼面石紋  
突山而獐狼有透漏如太湖石謂之湖石武康嘗欲  
聚而作譜恐未能悉其品也粗記如此

歛石製硯識者以爲在端溪之上予讀江賓陽送姪  
售硯序因刪次其語爲歛硯志

唐開元間獵人葉氏得石於長城里琢爲硯遂開天  
下山在羊關嶺之巖兩水夾之水盡處乃產硯石有

坑一曰緊足次曰羅紋今呼爲舊坑又次曰莊基三坑相去百餘步而石品實異舊坑又自爲三曰泥漿曰紫心曰綠石去舊坑纔數尺而石品復異自莊基北行二里泝溪而上曰眉子坑則東坡所歌者今在永底不可斷矣

舊坑綠石爲上生在石中斷者先去頑石次得硯材然極麤工人名曰麤麻石石心最緊處爲浪出至慢處爲絲愈慢處爲羅紋故曰緊處爲浪慢處爲絲

下理然

絲之品不一曰制絲曰內裏絲曰叢絲曰馬尾絲曰  
吐絲爲奇正視之疎疎見黑點如洒墨側視之刷絲  
粲然工人謂之硯寶蓋石之精云惟素心坑或有之  
他產則劣故三衢絲石黑而頑南路絲石暗而黝綿  
潭絲石浮而滑夾路絲石紅而枯水池山絲石枯而  
燥皆不甚宜筆墨云

宋謝堅知徽州時嘗於舊坑取石貢理宗初坑上嘗  
有五色雲氣如錦余郡檄隨雲所覆處掘之得佳石  
有白文繞兩般花轉如二龍旣發爲硯而雲氣不復

見矣

哥窯淺白斷紋號百圾碎宋時有章生一、生二兄弟皆處州人主龍泉之琉田窯生一、二所陶青器純碎如美玉爲世所貴卽官窯之類生一所陶者色淡故名哥窯

雲蕉館紀談

魯人孔通

友諒愛姬茗華夫人善月琴友諒出師必以隨呼爲  
粧駕未幾物故葬于右耳峯猴溪橋側樹石月琴以  
表之至今人名月琴塚

友諒聚鹿數百畜于南昌城西章江門外謂之鹿園  
嘗至其所自跨一角蒼鹿綴瑟瑟珠爲纓絡掛于角上  
縷金爲花鞍群鹿皆飾以錦繡遨遊江上 國初  
駕至南昌宴于滕王閣上命儒臣韓詩放其所畜鹿

于西山

友諒在江州時嘗以春暮結綵爲花樹自府第夾道植至匡山又剪繡于道上與宮人乘肩輿而行黃信詩云錦繡鋪張春色滿小車花下麗人行是也

陳氏旣亡有宮人小春逃之民間嫁于蒲亭彭本清本清問陳氏宮中事小春言後庭數百人皆錦衣玉食用極奢侈有柔妃者陳所至愛海賈所進金絲紐花襖紫霞帳水晶樓鳳箱皆以賜之及敗投武昌井死又陳氏喜食王葉羹以西山羅漢菜及曲江金花

魚爲之味頗佳

明玉珎徐壽輝臣也初倪文俊陷川蜀令珎守之旣而陳友諒殺文俊又弑壽輝珎遂僭號改元時至正二十三年也初都成都繼又都重慶珎卒子昇嗣

浣花溪自唐薛濤後能以溪水造箋者絕少珎守蜀時有郡人陸子良能之巧過于濤珎于溪上建搗錦亭置箋戶十餘家令子良領其事箋有桃花鳳彩雲樣錦幅等名夏亡子良又死今不復有矣

蜀人多以酴醾花作酒未得其妙又以竹葉竹蜜貯



筠管中合釀之十餘日開來香聞一室味極甘美氣更清涼至今蜀人傳其法號開襟酒

昇在重慶取涪江青蚘石爲茶磨令宮人以武隆雪錦茶碾之焙以大足縣香霏亭海棠花味焙于常海棠無香獨此地有香焙茶尤妙

昇能飲宴會不用杯盞以大甕盛酒用忠州引藤一吸半甕夏月畏暑作露帳四面架風輪以花竹簾臥其中宮庭侈甚席地以蘇薰薦鋪錦褥于上官人不用甕兀以此爲坐

城西清水穴亦名粉水井。巴人以爲粉則膏膩鮮明。昇建銀輝館于側署官掌之以供公用。日給數定于宮內號其官爲花粉御史。

蜀地荔枝叙州爲上。昇于荔枝熟時設荔枝宴以會左右。有詩云：香浮琥珀御醪潤，色重雞冠新荔紅。是也。

廣安出紫梨，到口卽化者爲佳。昇取其汁和紫藤粉爲糕，名雲液紫霜，食之能却醉。

帝王廟北極真武廟並在，鷄鳴山俱國子祭酒宋訥

奉勅撰記普濟禪師亦葬鷄鳴山又有都城隍廟  
學士劉三吾奉勅撰記

江學庭爲祭酒帝幸國學講易之太極言亨屯循  
環治亂倚伏惟在人君謹之斯爲得耳帝悅賜宴  
崇文閣詔自今講讀明于勸戒者例皆賜宴名光儒  
宴

友諒時或進煖玉注出于薛塘古墳謝庭春獻月色  
之盃得于弋陽陶氏又開寶市于僞都招致海商大  
賈仍建尊詠館朱衣巷內以待有寶者設賓客卿使

之名豐其穀祿別其敬禮得其絕色以進則封爲奇  
貨上賓得珠玉以進則封爲珍精貴客又有華卿麀  
使亞于賓客也

兼葭堂雜抄

上海陸楫

太祖皇帝用真經大復中庸之經人

闢乾坤於再造功高湯武不但邁漢唐宋而已得以

爲此固天命聖神爲千古爲百王雪耻無足

異者但皇卽位改元之年已計一四海在位三

十一年身致太平壽七十有一諸子二十餘人親封

王爵星布海內古今帝王之全福亦皇一人而

已

國朝成化弘治間大學士劉文靖公繼丘文莊公濬  
同朝雅相敬愛劉北人器度嚴毅在內閣凡事獨秉  
大綱其學問不事博洽丘南人則博極羣書爲一時  
學士所宗所著有大學衍義補等書一日劉對客論  
丘曰渠所學如二倉錢幣縱橫充滿而不得貫以一  
繩識其學無大綱也丘公聞之語人曰我固然矣劉  
公則有繩一條而無錢可貫獨奈何哉士林傳以爲  
雅謔云公雖名位相抗而劉相孝廟二十年碩德重  
望卒受顧命稱本朝賢相丘之所就似爲不逮相業

豈以博洽爲貴哉

自隋設進士科至宋則定甲第其第一甲賜進士及第或二十餘人

第一甲例取三名釋褐日卽授翰林修撰續修等官館之館閣以備台輔其重無以加矣然讀黼老泉之文有曰今進士三人之中釋褐之日天下望爲卿相不十餘年未有不爲兩制者豈宋時第一甲進士雖多而銓選資序或亦以三人爲重國朝之制亦祖其意而爲之與然不可考矣

本朝靖難死事之臣以天台方孝孺爲首孝孺博學宏材少時嘗過嚴陵釣臺有古詩一章敬賢當遠色治國須齊家如何廢郭后寵此陰厲華槽糠之妻尚如此貧賤之交安足倚羊裘老子早見幾却向桐江釣烟水此不獨工於詩亦天下第一等議論也

本朝兩畿十三省鄉貢士俱有定額雲南貴州二省以地方地僻解額獨少二省鄉試士俱合試于雲南共五十五名雲南三十四貴州二十一其後貴州士苦于就試雲南嘉靖丁酉巡按御史王杏題請乞分



科 詔行之是年雲南解額增至四十名貴州解額增至二十五名共增十名矣湖廣解額六十五名庚子撫按合請于 朝以湖廣乃今 上龍潛之地 皇考獻皇德化所及乞增額 詔增至九十名 本朝愼下舉士類如此

嘉靖己丑遂菴楊公爲首相 上倚注甚切時議禮諸公受知于 上相繼登樞要尚書霍文敏公韶時爲詹事忌公尤切特疏劾公 上大怒削秩賜罷文敏猶欲根蔓公門下士一網打盡有大學生孫育公

之鄉人也受恩最久百凡家壘公保護如子弟公在  
相位授育入文華殿供事以書寫資勞例得受京職  
時亦以公黨與恐遭斥逐乃錄公居官事數十條呈  
於文敷以求自解不意數月後以暴疾卒於京其子  
奉柩還公猶易服弔其喪其子跪泣曰人子固不敢  
言親過但悖德者不祥吾父負公而死天也願公無  
弔公笑曰爾父豈負我者我爲人所將波及汝父輩  
汝父欲保全身家萬不得已姑借我以免禍耳吾獨  
能京之是我又負汝父矣人皆服公雅量

本保費文憲公年十六領癸卯鄉薦赴試禮部道經  
呂梁洪時公從父某爲主事有事於此一見公卽曰  
吾姪此行不第當卒業北雍公愕然問故答曰近得  
一夢吾見姪在北監領籤出館籤上寫彭時二字彭  
公狀元宰相也吾姪勉之已而公是年果不第卽入  
北監讀書專事博洽以資策學至丁未果狀元及第  
官至少師太學士計得夢時彭公尚在及後彭公卒  
于官謚文憲公以嘉靖乙未再召入闕亦卒于官謚  
亦如之二公不但科第祿位偶同雖考終賜謚如出

一轍亦異矣

每見館閣諸先達科後學縷縷道國朝典故先文  
裕公出入館閣前後幾四十年每見國朝前輩抄  
錄得一二事便命不肖熟讀而藏之蓋士君子有志  
用事非兼通今古何得言經濟此先儒所以貴練達  
朝章而魏相條晁董之對特見重於朝廷良亦爲  
此朱文公有言知古不知今者葉正則也知今不知  
古者陳同父也既知古又知今者呂伯公也今世學  
者儘有務爲博洛不究心當代事故一問及朝廷

典故及一代之經制沿革恍如隔世縱才華邁衆恐其見諸施爲自多窒礙宜識者目爲俗學無足怪者矣

吳中名士陸楠登鄉薦上南官不售歸過楊州鈔關有部官司關欲稅其舟楠投一詩云獻策金門苦未收歸心日夜伺東流扁舟載得愁千斛幸有明王不稅愁其官見詩迎而禮之下第士聞者莫不爲之絕倒

嘉靖庚子子自京師還過淮陰漂母祠見題古詩一

絕於壁間有云賢哉一飯恩千載猶廟食如何漢諸陵寂寞生荆棘吁可以志感矣

皇朝輿地前古無比倚與盛哉然有可疑者一事堯舜時冀州爲王畿四方皆二千五百里今冀州之北能幾何耶三吳在古不入職方其民皆斷髮文身以與蛟龍雜處若空其地爲職下也今時賦日繁而古之遺跡不異其水之不爲害者天幸爾萬一泮水不知何以處之區區開築難以言善

徐武功在史館修何尚書文淵事賦詩曰温州太守

重來歸昔何嫌退今何違卻金館在已如掃掩月堂  
寒空掩扉人間固有假仁義天下豈無公是非老夫  
添乘春秋筆不作詆訕取世譏

鳳凰臺記事

三湘馬生龍

築京城用石灰秫粥錮其外 上時出閱視監掌者  
以丈尺分治 上任意指一處擊視皆純白色或稍  
雜泥壤卽築築者于垣中斯金湯之固也又于城外  
起土城以爲不測屯守之計宮中陰溝直通土城之  
外高丈二濶八尺足行一人一馬以備臨禍潛出可  
謂深思遠慮矣

洪武初以造海運及防倭戰船所用油漆樓纜悉出



于民爲費甚重乃營三園于鍾山之陽植稷漆桐樹  
各千萬株以備用而省民供焉

洪武初于江南門外稍南五里開河通大江江中舟  
船盡泊此以避風雨名上新河又開下新河官司馬  
快船所泊處

玄武湖屢溢築堤以防之名太平堤在太平門外又  
佛寧門外開穩船湖以通江水爲泊舟避風之所一  
建來賓重譯二樓于聚寶門外待四朝貢者舊有  
魚脊弓絳鱗盤皆中土所少者本淳泥國王物王永

樂中來朝卒于京師因遺二物于館後遷都取去玉  
墓在石子崗

太祖初渡江御舟頻危得一檣以免令樹此檣于一  
舟而祭之遂爲常制今在京城清涼門外已逾百四  
十年矣有司歲脩祀給一兵世守之居舟傍免其餘  
役或云卽當時操舟兵之後也

太祖駕幸鍾山僊洞詹同文應制詩云大駕春晴

臨寶地鍾山老翠擁金僊瑤花如雨三千界紫氣成  
龍五百年風送香煙浮袞服池涵樹影拂青天詞臣

侍從何多幸安得詩才似湧泉

石城開邊有清江樓石城樓三山門外有集賢樓皆  
洪武間建以聚四方賓客

初監生歷事諸司皆旦往夜歸號舍往返十餘里

太祖一日命察諸司官吏等獨戶部歷事監生不至  
逮問對曰苦道遠行不前爾 上始知之因給歷事  
監生驢錢令負驢而行

高皇后足最大 上嘗戲之曰焉有婦人足大如此  
而貴爲皇后乎后卽答曰若無此足安能鎮定得天

下

元宵都城張燈 太祖微行至聚寶門外見民間張  
一燈燈上繪一大足婦人懷一西瓜而坐 上意其  
有淮西婦人大足之訕乃勦除一家九族三百餘口  
隣里俱發充軍

太祖時整容匠杜某專事 上梳櫛修甲一日 上  
見其以手足甲用好紙裹而懷之 上問將何處去  
杜對聖體之遺豈敢狼籍將歸謹藏之 上曰汝何  
詐耶前後吾指甲安在杜對見藏奉于家 上留杜

命人往取甲其家人從佛閣上取之以朱匣盛頓香  
燭供其前比奏 上大喜謂其誠謹知禮卽命爲太  
常卿後卒葬于宋西寧晟塋側至今猶有表題曰太  
常卿杜公之墓

太祖進膳有髮召問光祿官對曰非髮也龍鬚耳因  
卽捋鬚得一二莖遂叱去不復問

洪武中京師有校尉與隣婦通一晨校瞰夫出卽入  
門登床夫復歸校伏床下婦問夫曰何故復回夫曰  
見天寒思爾冷來添被耳乃加覆而去校忽念被愛

妻至此乃忍負之卽取佩刀殺婦而去有賣菜翁常  
供蔬婦家至是入門見無人卽出隣人執以聞官翁  
不能明証伏獄成將棄市校出呼曰某妻是我殺  
之奈何要他人償命乎遂自監決者欲面奏監者引  
見校奏曰此婦實與臣通其日臣聞其夫語云云因  
念此婦忍負其夫臣在床下一時義氣發作就殺之  
臣不敢欺願賜臣死 上嘆曰殺一不義生一無辜  
可嘉也卽釋之

願豐堂漫書

雲間陸深

南畿辛酉鄉試少傳劉野亭先生忠以翰林侍講爲  
考試官策問中有及宗室日繁而祿入不繼者余  
當時才以恩義立說謂恩之所不能周者則當裁之  
以義與其過於恩而非禍不若裁以義而無患此特  
場屋體耳漫無籌策遂占首選程文所刻乃欲折鈔  
以當俸入亦非通論此事嘗往來於懷常與朋僚議  
之今制雖將軍殿下亦歲給祿米二百石金枝玉

葉日以廣衍傳之千萬年之後雖竭天下之力不足以供之蓋坐困之道也宋神宗時王荆公安石作相裁減宗室恩數宗子相率訴馬前荆公徐諭之曰祖宗親盡亦須祧遷何況賢輩宗子遂散去其後宋宗室無論戚疎少長皆仰食縣官西南兩宗無賴者至縱其婢與閭巷通生子則冒爲己子以利其請給其醜若是今太宰遂菴楊先生一清謂宜自國王而下以次制其妃嬪之數蓋有見也

凡圖畫雷形作人間小鼓環而聯之或畫其神狀如



飛鳥而銳喙肉被赤色而人足按宋大觀間大滌山人胡真隱居山間一日忽聞有聲若鼙鼓數百黑雲驟馳間火毬相逐已而迅雷烈風移時乃止夫陰陽相搏擊則爲雷非若七政可以形象求也雷若有象則火毬近是霹靂斧先儒所謂星隕而石之類火能生土故也晦菴劉少師健爲庶僚時奉 命往祀華山正及夏日晦菴與客高登顧見山下白霧瀰漫若大海然而山頂赤日了無纖翳俯視突煙暴起或丈餘遞至尺許亦無所聞頗異之從者以爲雨作也及

下山村麓人云適有驟雨挾震雷數百已過矣向所見煙中突起者悉雷也凡聲自下聞之則震自上聞之則否所謂山頭只作小兒啼者是已

周文襄公忱巡撫江南日巨璫王振當國慮其異已也時振新作居第今之京衛武學是已公乃令人度其齋閣使松江作剪絨毯遺之覆地不失尺寸振極喜以爲有才公在江南凡上利使事振悉從中贊之宋秦檜格天閣成鄭仲爲蜀宣撫遺錦地衣一鋪檜命鋪閣上廣袤無尺寸差檜默然不樂鄭竟得罪一

事極相類一以見疑一以見厚豈其心術之微有不  
同耶

楊髡發宋諸陵有裒其骨葬之者陶九成輟耕錄所  
載以爲唐義士珏瞿宗古歸田詩話所載以爲林義  
士塾周公謹癸辛雜志則以爲宋陵使羅銑者蓋中  
宦云

張莊懿公瑩仲子早卒聘都城趙氏女女聞夫卒卽  
與至夫家守制奉翁姑如婦禮年五十餘矣弘治間  
宜春劉侯德資琬守松上其事旌之題曰趙女張節

婦顧侍讀士廉以爲言婦則無所附麗言女則已去  
母家若不當旌者錢修撰與謙奮臂起辨之引張  
良陶潛爲事類至千餘言不罷郡中一閔子時逸南  
雍還心是士廉言而與謙已病革矣元余忠宣公闕  
爲中書吏部員外郎時安西郭氏女受聘未行會夫  
卒自縊死有司請旌其門闕以爲過於中庸不可以  
訓格不下惜當時禮官無引此以駁之者

婦人首飾以髮爲之者曰假頭亦曰假髻作俑於晉  
永元中弘治末京師婦女悉反戴之今漸傳四方矣

始非佳兆

正德壬申秋自饒還過蘭谿拜楓山章先生憇於所  
居白露山下因留一日語間及吳徵士與弼康齋先  
生云昔見白沙陳公甫獻章言公甫就學康齋時忽  
一日晨光初動窓外見康齋手自颺穀其子從作厲  
聲曰秀才恁地懶惰只如此何到伊川門下又如何  
到孟子門下又一日出穫手爲鎌傷流血不止舉視  
傷處曰若血不卽止而吾收之卽是爲爾所勝言已  
而獲如故又往遊武夷過逆旅索宿錢至多三文堅

不與或勸之曰卽此便是暴殄天物乃負擔而夜往  
焉

天爵堂筆餘

四明薛崗

客星非吉星亦非因子陵而見剡溪漫筆辨之最詳  
楊升菴先生無書不考有詩云半天高標驛門青我  
是客星非使星亦作吉星用不知何說

舍利余見數處大小不一有二三粒四五粒者盛以  
美器幕以絳紗視之皆砂礫附會可笑獨吾鄉阿育  
王寺者良異余十五六歲時同衆瞻禮見舍利繇微  
漸大漸生白毫光俄而變五色其光用市如車輪或

東西轉或南北轉或平布旋轉或成大珠一圓或散作小珠數十圓久之而滅余驚恠稽首而衆皆稱不見

本朝永樂宣成正嘉寧器與宣廟銅爐數百年後價視宋時諸甕商周彝鼎必翔宋甕色製雖古雅而器之精工細澤遠遜今代彝鼎出土者反易毀宣爐在今日已不多得矣吳中名畫如沈啟南文徵仲唐伯虎陳道復諸公後世珍之不在趙文敏米襄陽黃癡倪迂之下而吾鄉金本清太僕畫竹亦必在文與



可蘇長公之間以其皆文人之筆無一毫畫工色相  
更難在每畫之中詩與書法無一不佳百世可知推  
之以理

畫中惟山水義理深遠而意趣無窮故文人之筆山  
水常多若人物禽蟲花草多出畫工雖至精妙一覽  
易盡余謂丹青有宗派姑蘇獨得其傳

讀書作文俱要一副真精神坐則神奮卧則神弛此  
常情也然卧常可以作文而必不可以讀書曹操有  
歌案可卧讀楊盈川有卧讀書架二君不知何見今

之對書而睡者當傲之

六經二十一史文章在茲經濟亦在茲所當讀之書盡于此矣此外卽諸子亦經史鼓吹耳讀固可不讀不妨近日學者務旁求百家雜撰尤沈酣世說以爲奇而質以經史茫然不能應亦奚以爲

士大夫家少年子弟必不宜使讀世說未得其雋永先習其簡傲不可不慎

世說片語隻詞諷之有味但可資口譚近日修辭之士多翕然宗之振拾其咳唾之餘以飾文而亦斯小

矣

三百篇詩之祖也楚人之騷漢魏之樂府五言古詩  
去古不遠六義未乖所當誦法唐人之近體興而詩  
一大變然可兼爲不可專攻者也近日無人不詩無  
詩不律無律不七言卽五言律五七言絕句善作者  
少而況古詩乎夫至無人不七言律而誰謂詩不差  
矣

于鱗華山記旣竒旣古亦肖亦真方之寫照洵目送  
飛鴻之手不知記似三峰三峰似記必讀記而知華

之勝必登華而知記之佳想此老櫛管時定有岳靈來助是濟南第一文字

七言律法度貴嚴紀律貴整音調貴響不易染指余見初學後生無不爲七言律似反以此爲入門之路宜其欲入而自閉其門終身不得窺此道藩籬無怪也

謝少連改三國志作季漢書以尊漢室陳壽國志稱魏稱吳而于漢則稱蜀易國號以地名余少時深以書法爲壽病及今思之壽一代作者立意著史必有

所見魏吳本列國之號漢則劉氏正統之號夫以主  
統之號與列國對稱魏吳之失開卷便見故以蜀代  
之不知其大無當也朱子綱目雖以蜀漢接東西京  
之統而三國本志列在二十一卷者一字之誤萬世  
不能改今人作事有偶勝古人者季漢書是已

風人與訓詁人肝腸意見絕不相同訓詁者往往取  
風人妙義牽強附會老杜身後受虞趙兩君之累不  
淺近見剡溪漫筆解三峽星河影動搖引天官書註  
左旗九星在河鼓左右旗九星在河鼓右是天之旗

鼓動搖主兵杜公雖破萬卷恐未必拘拘証古若此  
暑月夜半露坐時觀晴空星河影隱映錯落儼然動  
搖處處若此况三峽乎剡溪通士不應爲此解

學問如家計日營運則家日長否則退學問不日長  
卽日退亦在乎爲之而已

嬰兒纔舉立見成人寸木方栽俄成林樾惟人學問  
只覺不增是故分陰可惜而思假數年

飲席中譚學問譚人陰私譚宦遊事蹟是大惡道耳  
不願聞然譚宦蹟止于取人笑譚學問使人如問有

取禍者譚陰私則鬼神從旁聽之

富貴人作貧態如公孫弘內服貂蟬外衣麻裘以布被示之貧賤之士作富態如庾杲之詣人餉糲枯魚菜菹曰我不能食忘其三韭二十七品之膳此輩自古有之不但今日始見以兩人較貧士富態更可也哉

漂母飯信卽今之老嫗見鬚眉男子行乞于市而與之食未嘗擇其人也觀其言曰吾哀王孫而進食明是哀其窮飯之而已矣王孫豈可哀之人乎偶然遭

信遂成千古之名士爲知己者死千金爲報信之意  
深矣

古今之稱做弟莫如象及舜以有庠富貴之象亦安  
焉不復以殺舜爲事矣使象生于今不當禪賢人邪  
陽明先生在龍翔時有象祠爲之記立意極奇觀先  
生之記象安可不祠人皆有兄弟而我獨無益不能  
不思及于象

沛公還軍霸上與父老約法三章約之爲言節也觀  
其言曰父老苦秦苛法曰餘悉除去秦法則秦法極



繁多沛公特節之而爲三章耳非相約也

孟子與荀楊同列漢以來皆然請廢莊列之書以孟子爲主自皮日休始

賈禹論贖罪之弊言孝文帝時貴廉潔賤貪污買人贅婿及吏坐贓皆禁錮不得爲吏夫贅婿爲貧不得已耳何至遂與買人贓吏同條漢人之輕贅婿如此傷哉貧也

保身于身所大欲德人于人所不知守志于志所未得輕世于世所不驚樂生于生所聊托惜福于福所

過享敦讓于讓所不堪祈天于天所未定真名言也  
哉

長卿儀部之才如天風乍來海濤忽湧難原其始難  
要其終不但今代無雙漢之文園唐之青蓮宋之坡  
老明之長卿蓋一身四現者也

役使羣動莫若權賢者操之不肖者弄焉操之天下  
安而身安弄之身危而天下危至操之則不能弄之  
則不敢而天下與身之安危奚屬

子產在鄴民不能欺西門豹在鄴民不敢欺子賤在

單父民不忍欺爲政者視鄭鄴單父何去何從

做官而時時言去決非豐林茂艸之人爲士而語語自高必是昏乞日驕之輩

生我父母知我鮑叔座主之恩不在父母下然有嚴君之令不行于逆子况師弟乎

在上必陵在下必援上交必諂下交必瀆以此思交安得無轉盼操戈者

隱忍皆因貪心所使士苟廉潔卽能安貧能安貧卽無所貪惡在其肯隱忍

南茶北酒非余僻論余走北方五省足將遍所至咸  
有佳釀北方水土重濁而釀反輕清不類其水土至  
清豐呂氏所釀又北酒之最上南和刁氏稍次之亦  
爲北酒之上品南則姑蘇三白庶幾可飲若吾郡與  
紹興之三白及各品酒幾乎吞刀可刮腸胃

阮光祿在剡會有好車借者無不皆給有人壻母意  
欲借而不敢言阮後聞之嘆曰吾有車而使人不敢  
借何以車爲遂焚之一段境界殊是不羣

譚輅

長洲張鳳翼

司馬公作通鑑朱氏非其帝魏乃作綱目黜魏帝蜀  
自以爲獨得之見不知其說昉于習鑿齒之漢晉春  
秋蓋以書以蜀乃宗室得爲正統魏雖受禪尚是篡  
逆至晉文帝平蜀始爲漢亡而晉始興焉是在晉已  
有此議論非創見于綱目也

晉書叙王敦桓玄宋書叙邵濬二凶于一一之後可  
謂得春秋書法

嘗讀宋史至韓魏公填空頭敕竄任守忠一事未嘗  
不廢書而歎第令正德初年館閣大臣能用此道以  
行韓文之疏則逆瑾輩甘心黜謫何至流毒薦紳旁  
及黎庶哉古事多可爲今人法而人多不能法古可  
惜也

宋淳化間東西兩浙饑民相率持杖投券富室取其  
粟皆坐強盜棄市知蔡州張榮取爲首者杖脊餘悉  
從杖以其事聞太宗感悟下詔褒之因遣使分詣諸  
道巡撫謂曰彼皆平民因饑取餼糧以圖活命耳宜

悉從未減不可與強盜同科此一事誠今時從政者之所當知

按束修二字人知爲弟子餽師之禮不知鄧后紀云故能束修不觸羅網註以約束修整釋之又鄭均束修安貧恭儉節整馮衍傳圭潔其行束修其心又劉般束修至行俱是此意可見自行束修以上言能餘躬者皆可教也又杜詩薦伏湛疏內有云自行束修訖無毀玷而註又云十五以上延篤亦云吾自束修以來爲臣子忠孝交不誦瀆何朱註以禮物言若是



禮物何以云然以訛傳訛遂不辨明

天下有大盜而踞其小者也曹馬盜人天下呂黃盜人國可謂能盜其寃皆不免禍至有欺世盜名者所盜無形宜若可免禍而亦有顯報蓋名者造化之所忌也不可以大位厚賞盜之也計世間物惟一閑字可盜語云偷閒偷即盜之謂也惟盜此庶幾無禍然閒亦未易可盜故曰不是閒人閒不得

先君性爽豁夏月作希綢一巾僅僅可數目郡人爭效之魯公戲予云尊公盛德特以希綢

似白璧微瑕予應之曰郭林宗折角謝安石蒲葵  
扇王遵業穿角履獨孤信側帽亦可作微瑕否舉座  
大笑

有一士入試嫌硯重問硯工何物可輕硯工云惟漆  
查作硯甚輕士子曰我知之矣我聞莊周爲漆園吏  
當向彼求之走而求諸周周曰汝要漆儘奉只怕人  
不識若漆查都被諸公偷盡矣此雖戲言似有所指  
也

子纂文選註旣成客有持示一貴游貴游初不知爲

何書及問其目云張君誤矣既云文選安得復選有詩哉客歸以語予予曰此事當問蕭君不予張君事也聞者無不失笑

客有向予談冒籍事有中式二次復擬問革者予謂聖世立賢無方不應有此如李斯謂四君皆客之功則敵國之人皆可用矣況堂堂一統莫非王臣耶且若樂毅自魏劇辛自趙百里奚自虞亦可以非土著而棄之耶孔子之齊之楚自是道大莫容非以冒籍見擯也客大笑

男子卽已身不沾祿于兄弟叔姪間有得科甲者亦  
宜足爲家慶乃有生忌心者寧冒訟同姓貴人爲宗  
攀援異姓貴人爲戚雖傾家而不惜婦人卽身不生  
育苟妾媵產子亦足以延宗祀乃有生妬心者寧至  
老無所依伶仃孤苦而不悔此舉世通弊惜無有能  
開諭之者

昔人謂借書一癡借與人書一癡旣借書而復還人  
書爲一癡予謂此說大誤事夫已無書而借人之書  
有樂取于人之意已有書而借人有與人爲善之意

借人之書既得其益仍復還之不失信義三者皆不得謂之癡也自癡之言一出而有書者不肯借人借書者不肯還人雖欲借書無從借矣

浚適縣祠唐后二山泉巫取民女爲公姬有妨嫁娶前後守令莫敢禁宋均命今後爲山娶者皆娶巫家勿擾良民其害遂絕較之西門豹投巫之事更不惡而嚴從政者所當知

坑儒之禍萌于橫議黃河之投起于清流士之處世可不思明誓保身哉

有張姓者別號心石年六十轉徙也客微詩壽之予  
戲贈一絕云博望聞孫隱博徒不須計酒亦呼盧今  
朝石上稱觴處試問添籌事有無然不至謔也近來  
吳中里鄙多傷人忤物時駕罪于予則不敢承矣  
曩時交際辭受俱真辭曰返璧受曰領謝近時辭者  
或止易一帖卽以其人之禮還餽其人自以爲委曲  
而不知儀物俱無當也

昔人作文但言所長則其短自見或言一人之長則  
一人之短自見猶有忠厚之意焉晚近世好干文字

中譏評人甚者至于罵詈吾聞罵詈成文章不聞文章成罵詈也此習不戒必有以筆舌買禍者

向平一云尚平范丹一云范冉李密一云李虔古人姓名且不免有誤况其遺事哉要之讀史者不可盡信書也

昔鄧養外孫苕公子爲後春秋書苕人滅鄧賈充以韓壽子謚爲後事實類此秦秀以爲悖理溺情以亂大倫是矣然以呂移羸以牛易馬古今亦不少更有合二姓以爲一人不知出何典也

郭景純青囊秘書自是堪輿占筮之術不知後世何  
緣用之爲醫家言考顏弘之傳求蛇膽療嫂不得忽  
有青衣童子持一青囊授含開視乃蛇膽豈後世因  
此遂用之醫耶

昔人謂至人無夢在上如黃帝如高宗在下如孔子  
如莊周可不謂至人乎然夢華胥夢良弼夢周公夢  
蝴蝶果是無夢否

有二偷入蔡喬室喬聲若雷震一呼二偷驚歎有偷  
入王獻之室盜物都盡獻之徐曰偷兒青氈我家舊



物可特置之羣盜驚走一何勇壯一何從容豈偷之所遇有幸不幸耶可發一大笑也

憲副金公世龍謝病家居者數年矣一日郝明府以賢士夫見問予首舉公明府不知吳中有此士夫也夫官至四品居城市而能使郡邑大夫不知其名非賢而能之乎此真今時絕無而僅有者

近來士夫謝病多挈一僧出遊以表見其高人見之便謂是蘇長公佛印作用不知高政不在此若金公者無僧亦高

齊門外靈殿寺有大銀杏樹約二抱爲土人徐鑰氏  
所購欲伐之方舉斧樹根出血樹上有聲而鑰家火  
發遂不敢伐久之復爲從兄鳴伯所得竟伐之今不  
二十年徐氏與從兄俱絕祀業亦銷滅殆盡孰謂草  
木無靈哉

戲瑕

吳郡錢希言

毛嬙麗姬人之所美也魚見之深入鳥見之高飛此  
出漆園氏語故唐人宋之間浣紗篇云鳥驚人松蘿  
魚畏沉荷花後世遂稱沉魚落雁之容至抱朴子曰  
昔西施心痛臥於道側蘭麝芬芳見者咸美其容此  
又言色能感動夫草木不獨魚鳥之有情者矣書固  
不可盡信哉

拾遺記禹導川夷岳而玄龜負青泥於後玄龜河精

之使者也龜領下有印文皆古篆字作九州山川之字禹所穿鑿處以青泥封記其所使玄龜印其上蓋青泥與漢武蘭金紫泥同類耳梁簡文與蕭臨川書必遲青泥之封故今人直以青泥爲墨矣

雲雨是先王楚懷事楚襄雖夢神女而賦中不云雲雨也乃唐人詩如傾國傾城漢武帝爲雲爲雨楚襄王雲雨無情難管領任他別嫁楚襄王料得也應憐宋玉只應無奈楚襄王今來雲雨知何處重上襄王璚瑁筵此類甚多往往誤稱相沿不改後遂爲

填詞家借資然使正其訛而作懷王便不成佳話矣  
高唐賦中且爲行雲至今亦莫有稱旦雲者看來古  
人下語練字皆須韻致不專以理勝也又閱元微之  
會真詩晨會雨濛濛則不獨稱暮雨矣

竹名龍鍾而唐詩雙袖龍鍾淚不乾則直以貌老人  
衰相矣然竹實有名龍鍾者羅浮山第三十一嶺半  
是巨竹皆七八圍長一二丈謂之龍鍾竹又名有名  
龍鍾者漢武帝時陽關外花牛津得異石長十丈高  
三丈立於望仙宮名龍鍾石

宋王微詠賦而廣文選誤王爲玉題作微詠賦下書  
宋玉之名王微乃南宋人史具有姓名宋人小說辨  
之詳矣近眉公枕譚亦援其說以爲疎謬如此殊誤  
觀者但余考宋書南史並稱微少好學無不通覽善  
屬文能書畫兼解音律醫方陰陽術數爲文古甚所  
著文集傳於世其說如此然時代遼遠古人文字少  
傳集中詠賦未之詳核乃唐陸龜蒙撰自遣詩二十  
二首載笠澤叢書者中一首云月澹花間夜已深宋  
家微詠有遺音重思萬古無人賞露濕清香獨滿襟

據此則天隨子博學人也不應託之聲詩乃爾豈亦  
讀誤本而云然耶然令此賦果山景玄手雖章華大  
夫吐詞命藻無以加焉是知古今人不甚相遠也

凡國之將命遣使往日奉命來日復命其稱謂有行  
李左傳曰行李之往來杜預注行李使人也宋儒謂  
杜氏不究意理然杜氏未嘗誤也乃是後人不究意  
理誤以遠行裝束爲行李耳觀隋江總有辭行李賦  
則行李爲行使亡疑矣

劉玄石於中山酒家沽酒酒家與于日酒三年已塋

開棺復醒故俗云玄石飲酒一醉千日此載博物志  
諸書可考搜神記乃演出一段無稽之談以酒家主  
人爲狄希以沽酒者爲姓玄名石讀之真可絕倒其  
非于今升筆斷無疑矣

梁權貴讀誤本蜀都賦注解蹲鴟芋也而爲羊字後  
有人餉羊肉答書云損惠蹲鴟唐率府兵曹參軍馮  
光震入集賢院校文選又注蹲鴟爲今之芋子卽是  
著毛蘿蔔此二事一出顏氏家訓一出譚賓錄並足  
軒渠滿朝貽笑千古



索 託跋燾登鄒山見秦始皇刻石使人排側之據  
南史宋書皆載其事以余考之秦有嶧山碑泰山碑  
胸山碑之碑琅玕碑金李斯籀文而未聞鄒山有  
秦皇石也豈亦所謂沒字碑耶聞山東鄒縣今有嶧  
山碑翻刻蓋嶧山故石燬于火久矣

魏高僧支謙博覽經籍兩眼多白而睛黃時人謂曰  
支郎眼中黃形軀雖細是智囊按晉支遁字道林世  
稱林公亦稱支公亦稱支法師亦稱林道人亦稱林  
法師未嘗呼郎也然則支郎之名終當屬北地道人

耳

南齊蕭詵等謀廢鬱林王領兵入宮出西弄殺之按  
隋書南寧有小勃弄大勃弄又洞庭山有風弄嚴陵  
瀨有風七里無風七十里土人謂之瀧或訛爲籠余  
以爲皆非必當從此弄字宋人葉夢得避暑錄話似  
未嘗考故因循其舊說耳或以衙字當弄字者恐誤  
衙卽巷字楚辭家衙家巷也楊子一闕一巷也

梁簡文樂府有愛妾換馬樂府解題曰愛妾換馬舊  
說淮南王所作疑淮南王卽漢劉安也古辭今不傳

後閱獨異志載魏任城王曹彰性倜儻偶逢駿馬愛之其王所惜也彰曰余有美妾可換惟君所選馬王因指一妓彰遂換之馬號曰白鵲後因獵獻於文帝此於淮南之說理較長矣乃宋人詩話却指鮑生以四絃換韋生紫叱憺爲愛妾換馬是開成後事也何其謬歟簡文樂府結語有真成恨不已願得路傍兒蓋應劭風俗通引古諺云殺君馬者路傍兒言傍人譽馬乘者盡力馳死也而唐人張祜詩結語翻案最佳恩勞未盡情先盡暗泣嘶風兩意同可謂脫胎換

骨

身不出樽俎之間而折衝千里之外韓詩外傳注曰  
衝衝軍也謂敵設此以臨城大臣謀于廟堂遙以折  
之按風后握奇經天地之前衝爲虎翼風爲虵蟠圍  
繞之義也天地之後衝爲飛龍雲爲鳥翔突擊之義  
也天地風雲龍鳥虵虎所謂風后八陣傳有圖記後  
代陣法皆出乎此夫握奇三百八十四字乃漢公孫  
弘所解豈注韓詩者未見其書故漏斯義而不之及  
耶漢末三國間有折衝校尉折衝中郎將燕喜輿根

爲折衝將軍隋沈光爲折衝郎唐有折衝府唐人曰  
司馬爲長松府折衝名各不同

三公象五岳九卿法河海三公象三台九卿法北斗  
春秋漢合華載此今世獨尚書稱北斗外藩諸侯得  
稱四岳與古異矣

塵餘

陳留謝肇淛

雞骨支牀百念灰廢惟是名根詞障未盡蠲除賓友  
過從下榻相對時徵僻事各記新聞不能言者強之  
說鬼退則稍爲刪潤上之側廩久乃成帙命曰塵餘  
塵餘者塵之餘也夫虞初齊諧繆悠不經山海宛委  
宜漫駭俗什九卮言強半道聽是帙也耳目近事歲  
月有稽徵且信矣世固有厭梁肉而嗜鯁鯁者  
丁應泰爲休寧令休寧民逐虎虎急竄入一古廟中

見土偶歸然以爲人也攫之偶蹄而折虎腰虎斃焉  
翌日聞於丁丁命播之歌謠以爲異政

有名醫將入蜀見負薪者猛汗於河中浴醫曰此人  
必死隨而救之其人入店中取大蒜細切熱麪澆之  
食之汗出如雨醫曰貧下人且知藥况富貴乎 不

入蜀

萬曆初江陵張相與司禮馮內使交驩甚一日會飲  
蒲州張相與馮江陵爲令口一枝紅杏出牆來裏面  
也好外邊也好司禮曰杖藜扶我過橋東我也靠你

你也靠我蒲州曰滿地榆錢不當飢這也使不得那也使不得

國初姑蘇閭門有伍子胥祠神像立而不坐坐則必毀時有童謡曰若要伍公坐須待二兄來及况公鐘爲太守入祠見之曰不可使神久立遂易以坐像自是不復毀矣

吳人張舉爲句章令有妻殺夫因放火燒舍乃詐稱火燒夫死者夫家疑之詣官訴妻妻拒而不承舉乃取猪二口一殺一活仍積薪燒之察殺者口中無灰



活者口中有灰因驗夫口中果無灰以此鞠之妻乃  
伏罪

談利

吉安胡江

靳裁之曰志于道德者功名不足以累其心志于功名者富貴不足以累其心趙子昂曰志功名者榮祿不足以動其心重道義者功名不足以易其慮模倣太過幾于謄錄古人之言矣

公字與私字相對竊疑古人之以公稱者或俱是名如曰蓋公丁公吳公龐公之類甚多自後世以君公字爲崇重之詞訓詁家凡遇稱公者皆曰史失其名

恐未必然也

錢狀元福才高一世然頗狂縱不檢既被劾去有詩  
曰一失足爲天下笑再回頭是百年人數月卒

天地未生聲韻具于太極天地既分聲韻具于天地  
一陽之復聲韻之萌蘖也四陽之豫聲韻之出地也  
有聲則有數有數則有卦色象臭味吉凶悔吝皆自  
然而然者

續御史綱歸吳絕意功名葺舊業于尹山之陽爲終  
焉計建思庵于先塋之側塑先賢范文正公文信公

像于中語人曰初吾自分得用于時常學范公否則  
爲文公死爾今兩失之奉其遺像以見吾志識者憫  
焉

遇群馬于途凡春穿毛脫疲憊而般腴者必官馬也  
逢數船于河凡蓬破篙折朽敗而鉅漏者必官船也  
蓋乘駕無節愛惜無人故易以敝嗚呼今之從政其  
亦以民爲官民乎

王建宮詞太儀前日暖房來囑向昭陽乞藥栽勅賜  
一科紅躑躅謝恩未了奏花開今人有遷居或新築

室朋儕陳金往賀曰暖房蓋自唐人已有的矣

王通著書事事欲學孔子故人以爲僭王莽在位制誥之類事事欲學堯舜而人不甚非之者其人不足責也

張元禎與時宰議不合乃乞歸養家居二十餘年益心性理之學名高一時天下想望其丰采

蘭亭記絲竹管絃之詞誠爲重複然不特右軍言之西漢張敞傳後堂理絲竹管絃則漢初已有此語

昔者聖人之作易也分陰陽而兩之者也上經首乾  
氣化之始也故彖傳言性下經首咸形化之始也故  
彖傳言情

蔡虛齋明經而尤長于易觀其去銓司而乞留曹甘  
心澹泊以遠權利知時審勢卒脫淮南之禍見幾而  
不俟終日非深于易者乎

兄弟天倫也友愛天性也泰伯以天下讓夷齊季札  
以國君讓劉愷丁鴻以封爵讓市道小人爭一錢之  
利遂閔于牆人品之不同如此

談刺

六

三

天地人謂之三才輪人以輶輻牙爲三才弓人以膠漆絲爲三才然其所謂三才者亦眇矣